

AWAJUN CHICHABAI JIIKBAU

**GOBIERNO TERRITORIAL AUTONOMO
AWAJUN**

GTAA

AWAJUNNUM CHICHAM IWAJA PUJUSTIN

ORDENANZA TERRITORIAL N° 11-2024-GTAA-I



1era Edición

AWAJUN CHICHABAI JIIBAU

INDICE

TITULO I.....	5
IJUMJA TABAU	5
TITULO II.....	9
PUJUTA NÚ, IYASHIA NÚ EMESEAMU	9
CAPITULO I: MAGKAGTAMU	9
CAPITULO II: UCHI MAA AJAPEAMU	11
CAPITULO IV: AJAPA UKUAMUNUM	13
TITULO III	14
AJANKAGTUSA DIJATCHAMU	14
CAPITULO I: WAIT AIG DEKASKEA IBAU CHICHAM UYUGBAU	14
TITULO IV	16
PATAJIMDAYA PUJUTA NÚ EMESEAMU	16
CAPITULO I: TSANUNIIJA NEMAJDAYAMU	16
CAPITULO II: AGKANJAM PUJUT TSUWAPJAMU	19
CAPITULO III: UCHI ATAAMU	19
CAPITULO IV: UCHIGTIN AYATKU PACHIACHBAU	20
TITULO V	20
AGKAN PUJUSCHAMIN AWAJKAGTAMU	20
CAPITULO I: AENTSTI AGKAN PUJUSCHAMIN AWAJKAGTAMUNUM	20
CAPITULO II: AENTSU IYASHI IWAINAKU DATSAN IPATBAU	22
CAPITULO III: JEGA UTUAMU	23
CAPITULO IV: IINUCHU AIG AUSA DIYAMUNUM.....	23
CAPITULO V: AGKAN IJUNTAIYA NUNU TUTITAG AWAGMAMU	23
CAPITULO VI: IPANIA TAKASMI TIBAUWA NUNU UMIACHBAUNUM	24
CAPITULO VII: AGKAN CHICHATA NUNU EPETDAIBAU	24
CAPITULO VIII: ACHIKA KATSEKAGTAMU	24
CAPITULO IX: ADIIJA KUICHIK JUWAMU	26
CAPITULO X: DATSAUMAINNUM EJEKAGTAMU	27
TITULO VI.....	28
WAJI AIDAU UUMKA KASABAUNUM	28
CAPITULO I: UUMKA KASABAU	28
CAPITULO II: JAPIKI PAAN KASABAU	30
CAPITULO III: KUNTIN MUUN TAGKUMTAI AINA NUNU KASABAU	31

AWAJUN CHICHABAI JIKBAU

CAPITULO IV: IINUCHU AIG JUWAMU.....	32
CAPITULO V: JUKI AWAIBAU.....	34
CAPITULO VI: TSANUMJA KASABAU AIDAU	34
CAPITULO VII: UWAKAGTAMU	35
CAPITULO VIII: NEJENCHAUWAITKU AKIINTAMU.....	36
CAPITULO IX: EMESEAMU.....	37
TITULO VII.....	38
KUICHIK TSAGKAMKAMU AWAGKEASHBAU	38
CAPITULO I: TSAGKABAU	38
TITULO VIII.....	38
DEKASKECHU AIG TABAUNUM.....	38
CAPITULO I: TSANUMJA JUWAMU	38
TITULO IX.....	39
INITIK MUUN UKUKBAUWA NUNÚ EMESEAMU	39
CAPITULO I: DELITOS CONTRA LOS BIENES ANCESTRALES	39
TÍTULO X.....	39
KUISHKIJAI YAPAJIAMUNUM TSANUBAU	39
TITULO XI.....	40
BATSATKAMU ANENJAS PUJUMAINCHAU AWAGMAMU	40
CAPITULO I: ISHAMAINNUM AWAIJATBAU	41
CAPITULO II: YUJATAI, CHICHAM AWEMATAI TUTIT AWAJMAMU.....	42
CAPITULO III: JATA PUJUT ITAMUNUM	42
TITULO XII.....	44
BATSAMTAI TSUWAPAMU.....	44
CAPITULO I: TSUWAPAKA EMAMUNUM.....	44
CAPITULO II: IKAMIA JUUKMATAI AINA NUNU EMESEAMUNUM.....	45
CAPITULO III: BATSATKAMU PAMUKJI AIKMAINCHAUN TAKAKUI	48
TITULO XIII.....	48
BATSATKAMUNUM SHIIG BATSAMTAIYA NUNA EMESTAU.....	48
CAPITULO I: SHIIG BATSAMTAIYA NUNU EMESEAMUNUM	48
CAPITULO II: JAKAU AINA NUNÚ AJANTUSA DIYASHBAU.....	50
TITULO XIV.....	50
AENTSU AYAMKE NAJASA DIYAMUNUM	50
TITULO XV.....	51
AWAJUNTIN TUTITAG AWAGKAGTAMUNUM.....	51
CAPITULO I: AWAJUNI PUJUTJI EMESTAMUNUM.....	51
CAPITULO II: GTAA TAKATJI EMESTAMU	51

AWAJUN CHICHABAI JIIBAU

TITULO XVI.....	52
EKENBAUWA NUNU WASUJKAMA EMEGKAMUNUM	52
TITULO XVII.....	53
BATSATKAMU TAKATJI TSUWAPJAMU	53
CAPITULO I: TIKICH AENTS AIDAU TAKAMSAMUNUM	53
CAPITULO II: BATSATKAMU MUUNJI AINA NUNU TAKAÁBAU	55
CAPITULO III: CHICHAM EPEGKASHMIN WAJAMUNUM	58
TITULO XVIII.....	60
BATSATKAMU TSANUAMU	60
CAPITULO I: PAPIINUM TSANÚBAU.....	60
TITULO XIX	62
AJANKAGTASHBAUNUM	62
CAPITULO I: AENTS AJANTUSA DIYASHBAU.....	62
CAPITULO II: WAJÍ AINA NUNU AJANTUSA DIYASHBAUNUM.....	63
CAPITULO III: SHIIG BATSAMTAIYA NUNU AJANTASHBAUNUM	63
CAPITULO IV: PACHIMKAS PUJUTIA NUNU AJANTASHBAU.....	64
CAPITULO V: ANENJAS BATSATKAMUA NÚ AJANTASHBAU.....	64

AWAJUN CHICHABAI JIIBAU

TITULO I

IJUMJA TABAU

Art. 1.- Awajuni nugkeen pujusa takamsamu aina dusha tu disaiya iwagtai atatua

Awajuni nugkeen pujusa takamsamu aina duka iwagtai atatui juju chicham umiktin najanamua nú diisa, tuja dutik iwagkuishkam Constitución Politikanum aentsu ayamke umikbauwa nunu pataetuka esetai atatui, nuigtush aentsu pujuti akasmattsa chichamjutai ati tusa tikich nugkanmaya aina nujaish ipaamatua tratados internacionales najanbaunum Perú pachiíntuk kuwesmakbau aina dusha imatiksaik ajantusa diisa emaku.

Art. 2.- Suwimkash wajuk niimtina agtatua

Suwimkak jutik sukagtutai atatui:

1. Egkea epenbau kuwashat tsawan. – Suwimak juní ati tusa Jintiin chichakmatai yaki takamsawaita nunú egkea epenbau batsatkamu epekjin, nuniachkush apachi epekjin.
2. Egkea epenbau ujumak tsawan. – Ujumak tsawantai egkea suwimak suwamu juju chicham umikbau diisa.
3. Batsatkamu takagbau. – Takamsamua nunú suwimak umiaku batsatkamu tunak atsumawa nunu takagbau.
4. Esébau. – Dewá nú eseebau inia pujutnum, dutikaku muun chichajkamu atin.
5. Akikmamu. – Takamkuish yaki maakchau awagkaji nunú awáktamu, nuniachkuish kuichkijaigkesh akiamu.
6. Intibaunum akikmamu. – Umiachkug juna akikmaku ati tibau aig chichaman antutsuk uwaga nú akikmak nagkanbau.
7. Ajapeamu. – Wajupa maakchaunak takamsae nú diigsa ujumak tsawantai batsatkamujin jiintuki pujusti tabau, nuniachkush tuke jiinki weu ati nii pujamunak ukuak tabau.

Art. 3.- Jintiin aidaush wajuk akanjamu ágtatua

Jintiin aidauk juni akanjamu ágtatui:

- a. Jintiin batsatkamu epegtin: Dekatkauk batsatkamu pamukji aina duke agtatui Jintiin aidauk.

AWAJUN CHICHABAI JIKBAU

- b. Jintiin Tajimat Nugka epegtin: Juka bakichik nugka tepagbaunum batsatkamu aina nuna chichaman epegtin. Adaikamu atatui bakichik Tajimat Nugkanum wajupa batsatkamu awa nunú tuwagkamunum.
- c. Wega Nugka epegtin: Juka chichama epegnu kampuji adaikamu awajuni daajin. Junak adaikau atatui GTAA Ipaamamujiya nunu, ekenbau atatui bakichik uwejan amua atina imán pujus chichaman iwajin ati tusa, duka etegjamu ágtatui bakibakichik 4 regionnumia, dutikaku bakichik ekesaik adaibau atatui 5 weti tusa.

Art. 4.- Chicham iwagtai akanjamu

Batsatkamunmaya Jintiin chichak jutik utugchata dusha iwagnagti tibaushkam shiig inagnakchamu wainkuik ekaematki tajimat nugkanmaya Jintiin pujamunum chicham tsauntai ati tibuwa nui segatai atatui anui iwajatjai tusa.

Aan yaki Wega Nugkanmaya ekaematki wejutai atatui jujú ayamak aina nunú shiig diischamu asamtai:

- a. Utugchat iwagkuish jutik ematai ati tusa najanamu aina nú antugchamunum.
- b. Jutik iwagtai ati tusa tibuwa aig dewaka yaja tibaunum.
- c. Chicham umikbauwa nuna ainjai tukama dewaamanum.
- d. Chicham jutik epegtai ati tibuwa nunu tupanja yaja yajupeamunum.

Art. 5.- Chicham iwagbau

Utugchatak iwagtai atatui wajuk batsamtai ainawa nú juuka jujui chicham umikbauwa nunu diisa, aika emamunum ju chicham umikbauwa nui atsakuishkam muuntash wajintuk chichayi nunú aintuja iwagtai atatui, tujash chicham iwagkuishkam aentsu pujutji ayamjutai ati tusa tratados internacionales aina nui umikbau aina dushakam diisa iwagtai atatui.

Art. 6.- Suwimak imijiamu

Imaan tsawantai suwimkan jukiti tibuwa aig jimaipituk apugtusa suwimak imijka sunasti tumainai Jintiina nú chichak, juna diis:

- a. Yaunchkesh katsekji atsugbauwa nuji diigsa; Magkagtuamua duka, tsakat katsekeamua duka juwig egkemtsui.
- b. Wakan wajasa, aniashkuish ishamkaikish nunikbau aina nunu diigsa; (iwainamu: kajeka jinat kajinkamunum, ishamka wakan wegamunum).

AWAJUN CHICHABAI JIIKBAU

- c. Kuashat atsumja wajanta, nuniachkuish pataakesh jamainnum pujau asamtai ikamjuktag tabaunum wainak takamsawa numamtinum jega nunú diigsa. (iwainamu: pataa jakui waji iinuchu aig achiibau).
- d. Takamsau ayatku, iik anentaimsa, tikima aan nagkaemasa emashtajai tusa awaanta imijiamua nunuji diigsa; (iwainamu: maanikma kuchiyai ijujatiu ayatku iik juki ampimatainum ema ampiamua nú diigsa)
- e. Takamas wajantash nigki anentaimas wii aankamjai tusa adaijamu aina nuwi wantinak sujumana nú diigsa.
- f. Mijanji 18 ajau takamsau aina nú diigsa; tuja muun mijanji 75 nagkagas wegamuji aina nú diigsa.
- g. Nampekbaunum pegkegchau wajakbaujiya nú diigsa, tujashkam imajuig wayatsui aentsu pujutji emegkatmaina nuni anentaimsa takamsamu aina duka.

Art. 7.- Suwimkaji esakatbau

Suwimak sunaschau atatui juju takamsamu aina nú diisa:

1. Ayamjumaku nunikbauji diigsa.
2. Patanakesh, nuniachkush tikich ayamjamunum nunikbauji diigsa.
3. Awajuni nugke ayamjaku nunikbaunmakesh, nuniachkush, batsatkamu wajiji aina nunú ayamjaku nunikbauwa nú diigsa.

Art. 8.- Suwimkagtua epegtaig achattawai

Suwimak sukagtakuish aents suwimku iyashi waitkamuk atsuttawai.

Art. 9.- Chicham epegkeamunmag batsamtatui mai utugchatnum pujuina duka

Jintiinuk utugchatnak iwajashtatui chichaman egkeawa nú, chicham egketuamua nú, nuniachkush, niina ayamjuktina nú atsuinaigkik.

Art. 10.- Ayamjumata nuna jetenke

Chichama egkea duka, chicham egketam awa nujai betek egakagtatui dita muunjimas chichamjumakagtin aina nuna, tuja ju ayamjutkati tusa egakbau aina duka Papii ayamka aujtusuké ati tubaitsui.

Art. 11.- Waamak iwagtai atatui takamsamu aina duka

Utugchat tepea duka waamak iwagtai atatui, initikich wajuk anentaimsaik chichamash waamak iwagtai ayi dutiksa.

AWAJUN CHICHABAI JIIKBAU

Art. 12.- Nunu chichamak iwaja ayatku ataktu pataka duke waketjuki diitai achattawai.

Bakichik aentsuk utugchatji iwagtugbau aigkik ataktú patakaik chicham apugtutai achattawai. Aantsaik, iinianum chicham inagnakbau aina duka apach iwagtainum yamajimaik wekaetutai achattawai, awajunnum wajuk inagnakbaukita nunui umikbau aigkik.

Art. 13.- Wajuk esetai atatua awajunti nugkén pujusa takamsamu aina dusha

Aents agaya aina nunú jutí batsatkamujin wekagas takama duka, awajuntik jutik utugchatash eseyin ami tusa jintamjuamua nunu diigsa iwagtutai atatui.

Art. 14.- Aentstí pegkegchau takagdaisamunum akiniamu

Akiniamuk mamiktamu atatui takamsauwa nuna suwimke apugtaku, juka yaki waitkam asae nunú akiam atatui. Jintiina duka diyaku atatui utugchat apugtusbau suwamu ati tibauwa nunú imanisag uminkati tusa.

Art. 15.- Wajuk umitai atatua akijatkuish

Jutik akikmatai atatui:

1. Waji megkaekawa nunu awagkeamu, nuniachkuish, nuna akikji diisa kuichik suwamu; tuja
2. Shiig awajtunikchamunum akiniamu.

Art. 16.- Tsawanji diigsa iwagtamu

- a. Apatka diisa ayamjamu: Juní takamsauk juju suwimkan jukiu ati tusa tibauwa nú diisa chicham iwajatasa pujamunum, yamajam chicham umiktin jiinkuish, apatka diisa, tu ima shijash takamsawa nuna ayamjusash chichawa nunú antujka iwagtai atatui.
- b. Tsawan suwimak apustusbauwa nú awagtamu: bakichik aents suwimak susam umiak puja duka, imaan tsawan pujusti tibauwa nunú awagtutai atatui, nuniachkush agkan idaitai atatui, tsawan wegamunum yamajam chicham umiktin jiiinak aatus tau akuig, waji utugchatnuma achinkawaita nuna pachis.
- c. Chicham duke mamiksa umiktina nú tsawan dakapatuamu: Tsawan apugsa juju tsawanta dui juna takámuk jutik suwimak

AWAJUN CHICHABAI JIIBAU

susamu ati tibauwa duka tsawan dakapatjamunum takamsamua duke diigsa suwimak sutai atatui.

- d. Wajuti takamsamuita nunú ainnawai: Wajutí takamsamuita nunú ainnawai, chichamash wajukkiya wantinua, nuniachkush wajutí egketuamuita nuwá diitsuk.

TITULO II

PUJUTA NÚ, IYASHIA NÚ EMESEAMU

CAPITULO I: MAGKAGTAMU

Art. 17.- Ayatak magkagtuamu

Etsegkamu 18 wajintua tuke aneas magkagtuau aina nuna pachisash nuwi waitsuk ayatak magkagta duka jukittawai 5 mijadai epeknum egkemá. Aents juna takamsauk jiiikbau atatui batsatkamunmaya, dutik pujutji ayamjaku wajupa tsawan suwimka jukiti tibauwaita dushakam aputusbau aig, aantsag wakitkig wayashtinai nii pujú wajakbaunmak, suwimka juki tsawanta umik jinkiu akushkam.

Art. 18.- Tuke aneasa magkagtuamu

Tuke aneas magkagta duka jukittawai suwimkan 20 mijan epeknum egkemá, juju anentaimtuja nunikbauwa nunú diigsa:

1. Tikichdau wakejusa diyaku ataitag tabaunum magkamagkagtakua unuimaju asa tuke aneasa magkagtuamunum, nuniachkush kuichik ataita tusa magkagtuamunum.
2. Takamsau asa wantiinkaig tusa uumku magkagtuamunum.
3. Udupiaja magkagtuamunum.
4. Adaijamu aina dukesh, ekenbau aina dukesh maamunum.
5. Nuwa maamunum.
6. Pataá mamunum.
7. Iwishin wakaní wainkae tusa magkagtuamunum.

Suwimak suwamu atatui 25 mijan epeknum egkea, juju pachija tabauwa nunú diigsa:

AWAJUN CHICHABAI JIIBAU

1. Uchi mamunum.
2. Tsakat katsekkama maamunum.
3. Tsupija maamunum.
4. Magkagtuata tusa inama nunú.
5. Inajam magkagta nunú.
6. Tsegas jatain apujus magkagta nunú.
7. Muuntush maamunum.
8. Wawea magkagtau initik muuntash wajuk ejenuk ayi imatika ejetimua nunú.

Art. 19.- Jinat kajinkamunum magkagtuamu

Juka, Ishamkaikish, senchi kajekbaunmakesh, najaimamunmakesh, anejatbaunmakesh, akasmamunmakesh, waitu pujushti tabaunmakesh, kajemtikamunmakesh, pachiachbau ejebaunmakesh jinat kajinkaikish, nuniachkuish wakan webaunmakesh magkagtumain aina nuna pachis tawai. Dekas jinat kajinkamunum magkagtua nú waitkuik ayatak kumpatum mijan suwimak susamu atatui epeknun egkea.

Art. 20.- Tuke aneasa magkagtachiatku chicham súmabau

1. Duka akikmaktatui bakichik UIT jujú utugchatnum aina nui nuniakug:
 - a. Magkagtuatjai tabau atsaig uwetki magkagtuamunum
 - b. Kuntinapi tusa dewaka magkagtuamunum
2. Nampeku ayatak ishinka wekaetai aina nuna anunkama magkagta duka ajitnai 5 mijan suwimkan epeknun egkema, nuigtushkam akikmaktatui wajupa tusag tiajat najaima dusha Jintiinu emtin. Nunú batsatkamunmayan maag jiki awemamu atatui aan pujutji ayamjaku, nuigtushkam juniaush wajuk suwimak sutai ati timawaita nuna umiktatui, aantsag suwimka umikashkam tu batsatkamunum pujus takamsauwaita nuig wakitkig awayam achattawai.

Art. 21.- Jakatjai takui yaigka maamunum

Tuke aneas pujumainchau awagsamunmakesh, akatjamunmakesh, nuniachkush jakatjai tutai yaigbaunmakesh aents jakamtaig yaki dutikagtuae duka suwimka jukittawai 2 mijan epeknun egkema, nuigtush akikmaktatui bakichik UIT.

AWAJUN CHICHABAI JIIKBAU

CAPITULO II: UCHI MAA AJAPEAMU

Art. 22.- lik uchi maa ajapeamu

Nuwa ejapjukua nunú uchi maá ajapea duka, nuniachkush, inamag uchi maá ajapea duka suwimkan jukiu atatui bakichik mijan epeknum egkemá.

Art. 23.- Ejapjukua nú uchi ajapmitkamu

Ejapjukua nunú chichak uchi ajapjutuata timatai uchin ajapmitka duka jukittawai suwimkan bakichik mijan epeknum egkemá.

Tuja uchi ajapmikatasá pujugbaunum nuwa jakamtaig yaki nunash aikawa nunú suwimkan jukiu atatui 5 mijan epeknum egkemá, nuigtushkam akikmaktatui najaima dusha wajupa tusaik Jintiinu emtinish uminkae nuna.

Uchi ajapkagta nunú ampijatta unuimaju ayatak nuniakug suwimka jukittawai 5 mijan epeknum egkema, nuigtushkam akikmaktatui najaima dusha wajupa akigkati tusaya tabaunma Jintiinu emtinish uminkae nuna.

Art. 24.- Uchi ajapatjai tatsaig ajapjamu

Ya uchi ajapata tujutkui uchi ajapdawa duka suwimak susamu atatui 3 mijan epeknum egkea. Dakitaunak uchi ajapata tusa waitkam uchi ajapatakama nuwa jataik, yaki tukagtawa nunú suwimkan jukittawai 5 mijan, nuigtushkam najaima nunú akiamu atatui wajupa ati tusaiya Jintiinu emtin takamsauwa nujai umikbauwaita imatiksaik.

Art. 25.- Kakanjamunum uchi ajapeamu

Nuwa suwimkama uchi ajapmitka duka suwimkan jukittawai bakichik mijan, nuigtushkam najaima nunu akiamu atatui wajupa ati tusaiya Jintiinu emtin takamsawa nujai umikbauwaita imatiksaik.

CAPITULO III: IYASH EMESTAMU

Art. 26.- Dukap iyash emestamu

Yaki awatkagtak iyashnum emeskagtawa, nuniachkush dukap tukagtak anentainum waitkajkagtawa duka suwimka jukiu atatui wají takata umikti tawa najaima dusha nuna antujuk, tuja nii tuchataish najaima nuna patayish wajintua nuna antujuk, aantsag akikmaktatui takamsa duka ampimamua nuna. Jintiina duka suwimka

AWAJUN CHICHABAI JIIBAU

apujkushkam wajupa dukap emeskagtugmauwaita nuna najawen diis sukagtin atatui.

Tsakatkesh, duwajuikish, aishjuikesh, muunchikesh, ejamtinkesh, jamamtin aina dukesh dukap iyashi emestamunmak suwimak juwamu atatui kauptum nantu epeknum egkemá, aantsaik akikmakbau atatui ampimamunum wajupa kuichik ajapnatsua nú.

Najaimitkamua nú niish takas pujuwaitak, nuigtush nuwentin abaunum dukap maasbau asa jaak takaschamin wee pujutaik, jujú tsagai, yaki takamsauwaita nunú kuitamkattawai kuishkinakesh, suwak nuniachkush tu wajii aidaunak atsumawa nuna suwak.

Art. 26-A.- Antigkam takaschamin weamunum

Suwimkajtukmá aentsun tuke emestan emeseg tunamitkauk juna suwimkan jukittawai:

- a) Tunamitkagbauwa nunú emesjamu asa ampiam atata nuna tuke akikmatin atatui nuigtushkam tunamitkagbau akushkam iwasu pujutaik nigki tuke kuitamin atatui.
- b) Suwimkagtuauwa duka inagketmainai tunamitkagbauwa nuna kuishkin 300 soles nantu nantutin, kuishkinum imatikmain dekapeachkush, imán kuichik nantutín tibauwa nuna dekapa diis wajiin sú atatui.

Art. 26-B.- Muunjimsa takatai aina nú dukap iyash emestamu

Batsatkamu muunji tusa adaijamu aina nuna, kuitamkagtin ati tusa etegjamu aina nuna, nuniachkush yaki amesh batsatkamu diin atá tibau ainawa nuna jeteká iyashín senchi emesta duka jukiú atatui jimag nantui egkema epeknum, aantsag ampiau atatui, nuigtushkam susau atatui kuishkinakesh, nuniachkush wajiinakesh wajupa tsawantan megkaewa nú dekapatuamu diisa.

Suwimámunum tsagautsuk jaamu ataik yaki suwimkagtuae duka suwimka jukiú atatui 5 mijan epeknum egkemá, aantsag akiktatui pataintinun wajupa atí tusaik Jintiinu eemtinish umikbauwaita nuna antus.

Art. 27.- Ujumak iyash emestamu

AWAJUN CHICHABAI JIKBAU

Bakichik tumig jamua nunú tsuwamaja tsagamunmak yaki awatkagtak iyashnum emeskagtawa, nuniachkush dukap tukagtak anentainum waitkakagtawa duka ame ampi tsuwamagtasatsumamua duka akikmakta tusa nuní suwimak sutai atatui, aantsag jaaku tepamunum wajupa tsawantan megkaewa nunú diigsa akitai atatui.

Art. 27-A.- Muunjimsa takatai aina nunú ujumak iyash emestamu

Batsatkamu muunji tusa adaijamu aina nuna, kuitamkagtin atí tusa etegjamu aina nuna, nuniachkush, yaki amesh batsatkamu uyumatin atá tibau ainawa nuna, aantsag Estado adaijamu aina nuna kakankama emeseakush ujumak emesjamtaig, jetejatka duka suwimkan jukittawai 24 tsawan epeknum egkemá, nuniak tsuwamamunum ampi akikmaktatui, aantsag tsawan megkaebaunum akiku atatui suwimamua nuna.

Art. 27-B.- Umiibaunum iyash beseamu

Yaki, juniktatjapita tusa anentai atsamunum pachiachbau umiibaunum ejekagtawa, duka ayatak akikmaku atatui ampimamua nui, nuigtush tsawan megkaebaunum akiku atatui antigbauwa nuna.

Art. 28.- Iyash beseamunum bakúmamu

Nii shiig anentaimchatin bakumatnum ejekagta duka, nuniachkush ishinka wekaetai aina nuna droganakesh, tikich detsemetai aina nunakesh nampeka anuntuk wegamunum bakumatnum ejekagta duka jukittawai suwimkan bakichik nantu epeknum egkemá, nuniak tsuwamamunum ampi akikmaktatui, aantsag tsawan megkaebaunum akiku atatui kuishkin nuniachkush wajiin suwak yanak bakue nuna Jintiina nú diyaku abaunum.

Art. 29.-Anentai tsuwapjamunum

Yaki anentai tsuwapawa duka Jintiin aputusbau atatui jutik suwimak sunasti tusa pataintin aidaujai chichaman apak.

CAPITULO IV: AJAPA UKUAMUNUM

Art. 30.- Ishamainnum pujaig ukuamunum

AWAJUN CHICHABAI JIKBAU

Ishámainnum, uchi tsakatchin, nuniachkush aents kakág uwemainchau wainiatak, niina uwejen aig, ajapa ukua duka suwimkan jukittawai 15 tsawan epeknun egkemá, nunikmatai jiyaku chichagkamu atatui Jintiin. Tuja ataktush patasag nuniakug tsawan suwimak aputusbauwa nunú apaatuka sutai atatui.

Art. 31.- Ishamainnum pujaig ayatak diyamunum

Aentsu maasu ayatak, jamainun wainiatak pachitsuk ukua duka suwimkan jukiu atatui ampi tsuwamamun akikmatak, nuigtushkam jukittawai 10 tsawan yanak dutikae nuna takajak, aantsag susattawai kuishkinakesh, wajinakesh Jintiina nunu diyamunum.

Art. 32.- Tikich akuishkam yaitsuk, adaijamu aina dukesh ujatsuk ayatak diijattsá idaikagtamunum

Aents jau wainiatak, nuniachkush ishamainnum pujau wainiatak yaitsuk, adaijamu aina nanakesh ujatsuk idaikagta duka suwimka jukittawai 4 tsawan batsatkamun takajak.

Art. 33.- Aents nigki imaninainchau asamtai uyumatka pujugbauwa nunú ishamainnum awaibau.

Ya uyumatuk pujayatak diyaku ayugtsuk, puyatjus kuitamtsuk idaibaunum aents jaamunum jegamainita duka jukittawai 15 tsawan suwimkan epeknun egkemá, nuigtush jukittawai 5 tsawan batsatkamun takajak, nuna umikmatai chichagka jiitai atatui. Tuja ataktush patasag nuniakug tsawan suwimak tibauwa nunu apaatuka apujtusbau atatui.

Ampijatin ata tusa apugkimuitak puyatkagtutsuk idaikagtakug batsatkamunum puja nunú jiiki awemamu atatui, dutikak niina apujin papiin egketuattawai batsatkamu pamukjiya nunú. Aantsag segattawai juju ampijatna duka tuke jiyaku awajuni nugkeniig takat susashbau ati tusa.

TITULO III

AJANKAGTUSA DIJATCHAMU

CAPITULO I: WAIT AIG DEKASKEA IBAU CHICHAM UYUGBAU

Art. 34.- Kajegkagtamunum

AWAJUN CHICHABAI JIKBAU

Ya kajegkagtus chichabaikish, uwejenkesh waikmak, weninkesh tunimtikak, jiinkesh pusagkagtak najaimasa diimainun anentain egketkagtawa duka suwimkan jukittawai 72 hora epeknun egkemá, nuniak akiktatui yanak dutikae nuna imaan ati tusa mai chichas umikbaunum. Tudaiyaju aina nunú wajupaiya akinimainita nuna ejechagtaik, Jintiina nunú apusau atatui wajupaiyai akinimainita nuna.

Art. 35.- Tsanumkagtamunum

Yaki wainak tikich aentsun tsanumjawa duka suwimkan jukittawai bakichik nantu epeknun egkemá nuniak akiktatui tsanumjugbauwa nuna jimaipituk UIT.

Art. 35. A – Tunchi tusa tsanumjamunum

Ya tikich aentsun tunchi tusa tsanumjugtatua bakichkish ejemainchau aig duka suwimkan jukiu atatui 3 nantu epeknun egkemá, nuigtú akikmaktatui Jintiinush wajupak titi nuna, aantsag awagtukiu atatui chichamjumak wekaebaunum kuishkin ajapa nuna.

Art. 35. B – Iwishin tsanumkagtamunum

Iwishin ejemainji atsugmaitak tikich aentsun auwai tunchik tusa tsanumja duka jukittawai 3 mijan suwimkan epeknun egkemá, nuniak akikmaktatui 2 mil soles tsanumjugbauwa nunu susatnun.

Tsanumjugbaunum aents maamu ataik iwishna nunú suwimkan jukiu atatui 5 mijan epeknun egkemá, nuniak akiktatui wajen 10 mil soles, tuja juju atsutaik yakita patayi dekatkau nunú akiam atatui.

Aantsag, iwishin bakichik aentsun takamsamuji atsaig au aankae tusa yaunchuk muuntaish aan ejetunishbau aig tawa duka tuke aneas tsanumkajtak tawai tutai atatui, nudiau asa suwimkan jukittawai 60 tsawan epeknun egkemá.

Aents atus iwishin timae tusa chichaman etsejak, anentaimsa diyamash yaunchuk muuntaish aan ejetunishbau aig tawa duka tuke aneas tsanumkagtug chichauwa nunin jinkittawai, nudiau asa suwimkan jukittawai wajintuk tití Jintiinush nuna.

AWAJUN CHICHABAI JIIBAU

Aents tsanumjugbauwa nunu yaja aneas maamu ataik, tsanumkagtujua nunú suwimkan jukittawai 3 mijan epeknun egkemá, nuniak akiktatui wajen 2 UIT, waje atsutaik akiktatui yaita dekatkau pataintin nuna.

Art. 35. C – Iwishin ame tsanumjata tusa akiamunum

Ya iwishnun akiktatua ame tsanumkum auk tunchi tusam bakuta tusash, nunú suwimkan jukittawai 60 tsawan epeknun egkemá.

Art. 36.- Wait aig chicham dapamtamu

Yaki nunikchamu aig, nii nunikua imatikas chichaman dapampawa, nuniak aentsu imanjiya nuna emestawa duka jukittawai suwimkan 45 tsawan epeknun egkemá, nuniak akiktatui tibauwa nuna 0.75 UIT.

Art. 36. A – Bakibakichik aentstish wajuk pujutayaita nuna jiija iwaina nunú

Wajuk pujutayaita nuna jiija wakan dakumkamunakesh, wakan egkekbaunakesh, nuniachkush papiinum agakagkesh tuke aneas bakichik aentsnakesh, nuniachkush apu adaijamu aina nunakesh maakchau ematjai tusa iwainaj wega duka suwimkan jukittawai 45 tsawan epeknun egkemá, nuniak akiktatui yana jeteawa nuna 1 UIT.

Tsakat aina nunú jujú takabaunum awaikuik suwimak junaktatui 6 nantu epeknun egkemá, nuigtushkam akikmamu atatui 1 UIT.

Art. 37.- Kajegsaikesh, tsanumjusaikesh aents jakauwa nunú, nuniachkush ayatak megkaekauwa nunú ukujin wait chicham dapampatku tsuwapjamunum

Jakauwa nunú, nuniashkusk ayatak megkaekauwai tusa jakaujai betek tibauwa nunú ajantusa diitsuk najaimamain chichagbau ataik, yakita pataintin nunú chicham egketam atatui augmatkagta nuna. Nuna tu wekaguk jukittawai suwimkan 6 tsawan epeknun egkemá.

TITULO IV

PATAJIMDAYA PUJUTA NÚ EMESEAMU

CAPITULO I: TSANUNIJA NEMAJDAYAMU

Art. 38.- Awajunnumash wajuk nemajdayamu atatua

Juní atatui:

AWAJUN CHICHABAI JIIKBAU

- a) Batsatkamu eemtin nemajdayamu: Duka aishmag nuwajai batsatkamu wainkamunum nemajdayamua nunuwai iniatish wajuk demajdaya wajakbauwaita dutikas, duka batsatkamu actajin agaja jutai atatui. Jutik nemajdayamua duka egawai nú batsatkamunmag pujau asa antugdaika batsamsami tusa, iikdaisa ajamdayaku shiig batsamsami tusa, aneenisa pujusagmi tusa, nuniaku nuwena katsuaja batsamta dusha emetja pujutai ati tusa.
- b) Estado eemtin nemajdayamu: Juka Estado eemtin aishmag nuwajai nemajdayamua nunuwai. Jutik umigmamtaiya duka Codigo Civil etsegkamu 262°num tawa nunú diisa nemajdayamua nunuwai.

Art. 39.- Apatmabaunum

Ya, batsatkamu eemtin nemajdaikau ayatak, nuniachkush Estado eemtin nemajdaikau ayatak tikichjai nemajdaikattawa, duka yamajam nemajdaikamua nunú esakatam atatui, nuigtushkam akiktatui jimaipituk UIT yama nagkamas nemajdaikamua nuna.

Ju apu aidauwai ame nuwenkagtin ata tibau aina duka:

- a) Batsatkamu kampuji pamukji aina nunuwai batsatkamu eemtin, Estado eemtin nemajdaitai atina nuna diistinuk.
- b) Batsatkamu kanawe pamukji aina duka ayatak dita batsatkamu eemtin nemajdayamun diisagtatui.

Art. 40.- Kuwashat nuwa apatja wegamunum

Yaki jujú Codigo jiintsaig apatmamag pujus nuweenakesh, uchijinkesh pachitsuk wekaewa duka suwimkan jukittawai 10 tsawan egkemá epeknun, nuigtushkam wajupa nuwanak waitkawa nunak jimaipituk UIT susattawai bakibakichik. Nuwa waitkam batsata nunú juní pujutan dakitajai wika wishá wajantin atajai tumama duka ayamke ajittawai.

Art. 41.- Estado eemtin nemajdayamu tikich nuwendukesh, aishjindukesh aig

Ya, nuwennun, aishjinnun dekyatatak tikichjai nemajdaiwa duka yamajam nemajdaikamua nunú esakatam atatui, dutikaku suwimak suwam atatui 10 tsawan egkemá epeknun, nuigtushkam akiktatui jimaipituk UIT yama nagkamas nemajdaikamua nuna. Juju suwimka

AWAJUN CHICHABAI JIIKBAU

duke apujtusbau atatui batsatkamu eemtin nemajdaikamunum aika takajdaibau ataish.

Art. 42.- Nemajdaimainchau aig chichamjamunum

Batsatkamu pamukji nemajdaimainchau aunak deokayatak nemajdaikatnume tusa chichamkajta duka suwimak suwaku 6 nantui takatsuk pujusti tusa niina takatjiya nunú awantamu atatui.

Art. 43.- Nemajdaitsaig inimjusa dekaashbaunum

Nemagdaikag pujamunum, nuwakesh, aishmagkesh jatintin, nuniachkush aishjintin, nuwendukesh amain, nunin dekajuamunmak, esakatam atatui nuwenamua nunú, aatus segabau ataik.

Art. 44.- Dakitamu aig nemajdaikatnume tusa wekaetamunum

Yaki nawanji dakitaig sujuktaj tawa, nawanjintin ainakushkam, suwimkan jukiagtatui 7 tsawan egkemá epeknum. ORDENANZA TERRITORIAL N ° 06-2023-GTAA-I tawa nujai apatka diisa suwimak suwam atatui.

1. Pataintin asan tajai tabaunum:

1.1. Pataintinaitjai tusa japiki sukagtustatus anentaima duka jujui jimag chicham jintiamua nua nuwiya bakichik sutai atatui takamsauwa nunu etegjamtai; i) batsatkamun anunkati tusa adaijamu aina nunú chichajkamu ati tabau. ii) ajamkagtin diyamunum, baikuanakesh, tsaagnakesh, tsuwaknakesh pataintin aina nunú uyunbaunum uwagti tabau.

1.2. Batsatkamu anunkati tusa tibau aina nunú dekaashbaunum wii pataintinaitjai tau asa nuwejata duka jujui jimag chicham jintiamua nua nuwiya bakichik sutai atatui takamsauwa nunú etegjamtai; i) suwimak susamu atatui ajamkagtin aina nunú diyamunum, baikuakesh, tsaagkesh, tsuwakkesh, pataintin aina dusha uyunbaunum; b) Akiktin batsatkamun bakichik UIT tabauwa nuna 10 % ji jiigki, aiksaik sumain bakichik UIT 10 % ji jiigki ya utugchat apugtaji dushakam.

2. Batsatkamu muunji aina nuna suwimke:

a) Batsatkamu munji aina nunú yaunchuk tikichjai anajmatdayawag batsatun wainiatak tikichjai nuwejatlug, nuniachkush waji papii iwaintumatai ati tibaukita nuna umitsuk nuwejatlug, suwimkan jutik jukittawai; i) naamak pujamuji ajapjamu; ii) Tsaagkesh, baikuakesh, datemkesh pataintin kuitamkamtai amamu.

AWAJUN CHICHABAI JIIKBAU

- b) Batsatkamunum muunjimsa takastin aidau adaijamua duka ijunja tuwakbaunum tibau atatui tuna suwimkan jukittawa nunú, nunikbauwa nujai dakapatua diisa.

Intibaunum akikmamu aina dusha utugkatnaita

Intibaunum akikmamunum kuichik ijumna nujai yaigbau aagtatui nuwakesh, aishmagkesh waitkatai aina nunú.

CAPITULO II: AGKANJAM PUJUT TSUWAPJAMU

Art. 45.- Ejapjukchamu aig nuniachkush uchigmakchamu aig tsanubaunum

Nuwa ejapjuku achayatak, nuniachkush uchigmakchawaitak tsanuma duka jukittawai 5 tsawan batsatkamun takajak. Aantsag suwimkan jukittawai ya aentsuk nuniachkush ya yachak nuwanash ejapjukjai tutanash, uchigmakjai tutanash anertainash suwawa nunú.

Art. 46.- Niyai apajig tusa tsanumjamunum

Nuwa chichak auwai apajig tusa dekas uchi apajichu aig tsanuma duka suwimkan jukittawai 7 tsawan epeknun egkemá, nii tsanuubauji ejetimu asamtai.

Art. 47.- Uchi uwamu

Uchi jujeju akushkam ya dekamainita nuna ujatsuk uwá duka, nuniachkush wainak juka uchik midauwai tusa tsanuma duka jukittawai suwimkan 5 tsawan epeknun egkema, nuigtú 5 tsawan takagsattawai batsatkamun.

CAPITULO III: UCHI ATAAMU

Art. 48.- Uchi kasabau

Apagtin akush, dukugtin akush uchi wantintutsuk kuwashat tsawan megkagak pujuwaitak uchin juwa duka, nuniachkush yaki uchin kuitamnaita nuna awagtutan dakita duka suwimkan jukittawai 5 tsawan epeknun egkemá, nuigtú aisksag batsatkamun takagsattawai 5 tsawan, nuniak uchinashkam waamak awagkiu atatui.

AWAJUN CHICHABAI JIIBAU

Art. 48-A.- Idaidayamunum uchi kasabau

Apagtinkesh, dukugtinkesh aminí uchi jugakti tichamuitak atá duka suwimkan jukittawai 5 tsawan epeknum egkemá, nuniak uchi awagtam atatuí.

Art. 49.- Tsakat aig tupikakta tusa akatet

Yaki uchi tsakat aig tupikakum jeem ukukta tusa akatjamunum uchi tupikawa duka suwimka jukittawai 10 tsawan epeknum egkemá, nuniak apagtinun akiktatui 60% bakichik UIT nuwian.

CAPITULO IV: UCHIGTIN AYATKU PACHIACHBAU

Art. 50.- Uchijui kajimatki kuitamchamu

Yaki uchi kuitamkatjai tusa actanum agag adujkau ayatak umiatsua duka epeknum egkemattawai wajupak diwimkagtawa nuna ijumak jiinkitin asa, tuja jiiinmainai epeknum egketa nú diwimkagtukbauwa nuna jimaipituk akikmak, jiinkushkam diwi juga nunak imán tsawantai akikmaktajai tumabiu asa.

Art. 51.- Nuwa ejamtin jaig ukuamu

Yaki nuwan ejapmikaka ayatak ukuawa duka suwimkan jukittawai 5 tsawan batsatkamun takajak nuniak akiktatui nuwan jimaipituk UIT. Nuigtushkam akikmaktatui nuwa ukukim pujus ejamtin asa kuitamamak kuichik ajapamua nuna, aantsag sutatui pensión uchinun.

TITULO V

AGKAN PUJUSCHAMIN AWAJKAGTAMU

CAPITULO I: AENTSTI AGKAN PUJUSCHAMIN AWAJKAGTAMUNUM

Art. 52.- Uwaaka aimentakatag tabaunum

AWAJUN CHICHABAI JIKBAU

Nunimainchau aig aikata tusa waitkakagta duka, nuniachkush dutikmain aig aikawaipa tusa uwákagtuk kakankagta duka suwimka jukittawai 10 tsawan ejetsuk imanchau nuniku akug tuja dukap suwimak susamu atatui bakichik mijan ejetsuk takamsamua nuji diigsa.

Art. 53.- Waitkamunum

Yaki egajatak nunak wekaetus waitkajkagtawa dijijan anentaimtus dakitamaitak duka jutik suwimak sutai atatui:

1. Aents 18 mijan ajamu nagkamas wega nunú, tsakatchin waitkau akug jukittawai suwimkan bakichik nantun nagkaiki tuja tikima shiig tsakatchin wekaetauk jukittawai suwimkan bakichik mijan nagkaetsuk, nunú tsawanta nunak Jintiin nii anentaimas apugtustatui takamsamu najawega nuna diis.
2. Waitkakagta nunú tuja waitkam awa nunú 14 mijan ajamu eke 18 mijanji ajegainatsu nuniamunum, patayi aig, nú jeganmak batsatbaunum nuniamua duka, yaki waitkakagtawa nunu chichaman juwak pujustatui akankam 10 tsawantan nagkaiki, nuniachkush 20 tsawanta nuna nagkaetsuk, atus Jintiin nii anentaimas apugtustatui takamsamu najawega nuna diis. Tsakat aidau jintintaig dusha jega akankamu atatui, muun aidau suwimak sutaiya nuwig pujuschattawai.
3. Waitkam awa nunú yaunchuk pujú ajakbau akug, nuniachkush nuwegkesh, aishjigkesh ajaku abaunum nuniamu akug yaki waitkakagtawa duka suwimkan jukittawai bakichik nantu epeknun pujus.
4. Ijunja takatai aina nuwigkish, Papii aujku batsantai aina nuwigkish, aents estado takagnukesh, nuniachkush tuwi takaámukita nuniamunum dijijatjatatus waitkajkagta duka batsatkamunum pujus aankau akug suwimak suwam atatui 5 tsawan epeknun egkemá, dutika akupeaku chicham egketuamu atatui takamsauwa nuna apujin anui suwimak susatajum tusa.

Art. 54.- Japiki uwamu

AWAJUN CHICHABAI JIKBAU

Ya, nunimaichau aig aentsu japiki uuk waitkawa duka suwimkan jukittawai 4 mijan nuniak waitkajkagtamunum akiktatui waitkam awa nuna 7 mil soles.

Art. 55.- Aents wasugkabaunum

Yaki, tsákatnakesh, muunnakesh, chichinnakesh, aents jamamtinnakesh juki takamtikak, nuniachkush adijak, nuniachkush sujuk kuishkin jukitatus wekaetawa awajun nugkanum pujus, duka suwimkan jukittawai 5 mijan epeknun pujus, nuniak waitkam awa nuna akiktatui 2 UIT.

CAPITULO II: AENTSU IYASHI IWAINAKU DATSAN IPATBAU

Art. 56.- Iyash iwainaku datsan ipatkagtamunum

Yaki, aniamunakesh, agagbaunakesh, dakumkamunakesh dii wekaewa, egkeka juu wekaewa, dakumak juu wekaewa paan iwainakuik datsamain aina nunash, duka suwimkan jukittawai bakichik nantu epeknun egkemá.

Nuní wekaga nunú tunak yajuake nuna iwainaj paan dapampakug jukiu atatui suwimkan kampatum nantu epeknun egkemá, nuniak akiku atatui yanak aikawa nuna 2 mil soles.

Art. 56-A.- Datsamain aina nunú yajuaka sujamunum

Yaki datsamain aina nuna wekaetus yajuaku asa juki sujawa, nuniachkush nuna anajmas kuishkin juwawa duka suwimkan jukittawai kampatum nantu epeknun egkemá, nuniak akiktatui antigbauwa nuna 2 mil quinientos soles.

Art. 56-B.- Dijjak aina nú yajuaka iwainamunum

Yaki, dakitamu aig, iwainawa nuniachkush sujawa dijjak aina nuna, duka suwimkan jukittawai 6 nantu epeknun egkemá, nuniak akiku atatui yanak waitkawa nuna bakichik UIT.

Art. 57.- Adaimaku aina nú ayawetbau

Yaki takamas iyawa artículos 56, 56-A y 56-B umikbauwa nui, duka juju articulo tawa nuna imatiksag umiktatui. Bakichik batsatkamu muunji ajti tusa adaijamu aina nunú ju utugchatnum iyakug adaimakbaujiya nunu ajapjam atatui. Nunia nunu estado aentsji akug papii egketam atatui niina apujin.

AWAJUN CHICHABAI JIIBAU

CAPITULO III: JEGA UTUAMU

Art. 58.- Jega utuamunum

Yaki jega utuawa, nuniachkush waji sujutainum dakitamu aig, papiish dutik najatuashbau aig, duka jukittawai suwimkan 7 tsawan epeknum egkemá.

CAPITULO IV: IINUCHU AIG AUSA DIYAMUNUM

Art. 59.- Chicham papiinum agaja awemamua nunú tikich aentsti ausa diyamunum

Dutikata tichamu aig papii tikich agatja awetimua nuna juki auja duka, nuniachkush wajiintuk chichawa tusa ega duka, ninuka epenchamu ataishkam dutikmainchau asamtai, suwimkan jukittawai 48 horas epeknum egkemá.

Art. 59-A.- Iwainakchami tibauwa nunu wainbau

Papii awemaku agagbaukesh, chichamkesh, tikich papiikesh numamtin aina nunu puyatjumain asamtai tikichik dekashti tusa tibau aig juki yaki diyawa duka suwimkan jukittawai 3 tsawan batsatkamun takajak, nuniak egkeam atatui epeknum 48 horas.

Art. 60.- Emegkamu

Yaki, papii agaja awetunimun, nuniachkush chicham awemamun, nuniachkush papii numamtin aina nunakesh tuke aneas emegkawa duka suwimkan jukittawai 7 tsawan epeknum egkemá.

CAPITULO V: AGKAN IJUNTAIYA NUNU TUTITAG AWAGMAMU

Art. 61.- Ijunja chichamunum tutitag awagbau

Yaki batsatkamu ijuntainum ijunja chichamunum waya tutitag awajkagtawa, nuniachkush awankagtawa shiig ijunjashmin duka suwimkan jukittawai 48 horas epeknum egkemá.

Art. 62.- Batsatkamu muunjimsa takasmi tibau aina nunú ijunja shiig chicham jintiatag tabau aig epetkagtamunum.

Batsatkamu muunji ati tibau aina nunú, najatus diijatu asa, ijunjami tusa chicham umikbauwa nuna epena duka awantamu atatui kumpatum nantu. Nunak dutikattawai Junta Directiva ijunag.

AWAJUN CHICHABAI JIIKBAU

CAPITULO VI: IPANIA TAKASMI TIBAUWA NUNU UMIACHBAUNUM

Art. 63.- Takasmi ipania tibauwa nunú umiachbaunum

Yaki, takasmi tusa ipania ijunjamu aig chichaman umiatsua nuniachkush takatan yaigbau ayatak yaimtsuk tatsuk bakichik tsawankesh, kuashat tsawankesh ikintua pujawa, duka suwimkan jukittawai 24 horas epeknun egkemá nuniak akiktatui ditajai takasmi tusa ijunjamua nuna wajupa tsawantaik takaschae nunu dekapatuamun.

CAPITULO VII: AGKAN CHICHATA NUNU EPETDAIBAU

Art. 64.- Agkan chichamain awajkagdashbaunum

Yaki ainta batsatkamu muunji nunú bakichkish nunimainchau aig nii dakitau asagkesh, nuniachkush tikich dakittaigkesh, adaikamuitjai tau asa nú senchijai chicham etsegmain aunash aikawaipajum tusa epetkagta duka awaantamu atatui 3 nantu imán tsawantai adaimakbaujiya nuna takaschati tusa.

CAPITULO VIII: ACHIKA KATSEKAGTAMU

Art. 65.- Achika katsekeamunum

Ya, achijatkagkesh, nuniachkush anentai pachimdaimaina nuninun tukagtigkesh kákagchau ayamjumamaina nuninum pujachbaunum, ayu tusa ayashbaitak kakankagtus chukinmakesh, numpignumkesh, nuniachkush kata bukunata tusagkesh, nuniachkush wajig ainta nuna awetukagkesh katsekagtawa duka suwimkan jukiu atatui 6 mijan epeknun egkemá, nuniak akiku atatui yanak waitkase nuna 12 mil soles.

Tuja achika dutikagtamua nunú:

- a) Tsakat 14 mijanji jegachu aina nui jugaki 12 mijanji aina nunakesh, nuniachkush aents jamantin aina nunakesh aika duka jukittawai suwimkan 10 mijan epeknun egkemá, aantsag akikmaku atatui 15 mil soles.
- b) Tsakat 11 mijanji ajamu jugaki 8 mijanji aina nuna aikauk jukittawai suwimkan 15 mijan epeknun egkemá, aantsag akikmaku atatui 20 mil soles.
- c) Tsakat 7 mijanji ajamu nagkamas cero mijanji ajamun aika duka suwimak susamu atatui 20 mijan epeknun egkemá, aantsag akikmaku atatui 25 mil soles.

AWAJUN CHICHABAI JIKBAU

Tuja aika katsekagtamunum jakamtaig yaki takamsae duka suwimak suwamu atatui 25 mijan epeknum egkemá, aantsag akikmaku atatui 30 mil soles.

Art. 66.- Nuwa aishmagkun katsekeamunum

Katsekمامu pachisa artículos 66, 67, 68, 69, aantsag artículo 70 wegaja nuwi egkemá nuwa takama duka jukittawai suwimkan aishmag aniaush wajuk suwimkan jukiti tibauwaita imatiksag.

Art. 67.- Achiamunum

Yaki, atunisa aniashmaitak achijatuk takajatua nuniachkush iyash ajantusa diimain aina nuwi achijatua katseekatag tusa nú anentaiyai, duka jukittawai 3 nantu batsatkamu epekjin egkemá.

Tuja jujú aina nunú tsakat aikamunmak yaki nuní takamua duka jukittawai suwimkan 2 mijan egkemá epeknum.

Art. 68.- Katsékatasana entaimtuja dutikamunum

Yaki, atunisa aniashmaitak, chukinmakesh, pujutainmakesh, nuniachkush bukutuata tusagkesh kakankagtawa duka, apajkamu asagkesh, kakaaku atamaki ukukbau asagkesh katsékagtukchau akushkam suwimak suwamu atatui bakichik mijan epeknum egkea.

Tuja tsakat jutika waitkamu akug yaki takamua nunú suwimak suwamu atatui 2 mijan epeknum egkea.

Art. 69. – Aikatasana wekaetaku waitkamu

Yaki patagas wekagas ayashmaitak aiktuatatus waitkagagtawa duka suwimak susamu atatui 6 nantua nuna akaetutsuk aniak bakichik mijana nuna inagketsuk, junak Jintiin nii anentaimas aputustatui.

Tuja tsakatkesh, aents jamamtinkesh waitkasbau ataik, suwimka duka bakichik mijana nuna ukujin awagtutsuk sutai atatui, nuniashkush 18 nantua nú inagketsuk sutai atatui batsatkamu epekjin egkea.

Art. 70. – Uwaakana aikatag tabaunum

AWAJUN CHICHABAI JIKBAU

Yaki, awanmasagkesh, nuniachkush uwakagtukagkesh ánkami tusa tukagtawa duka suwimkan jukittawai 3 nantu epeknun egkemá, nuniak akiku atatui yanak waitkase nuna 1500 soles.

Tuja aika waitkamua nunú tsakat ataik, nuniachkush jamamtinun waitkau ataik, suwimkak aputusbau atatui 6 nantu epeknun egkea takama nunú, aantsag akikmaktatui 3 mil soles.

Art. 70-A. – Wakemitkaka yunumtikbaunum

Yaki tsakat 14 mijanji ajamua nuwi nagkamas 18 mijanji aja nuna tsanug wakemitkak yununak dutikawa duka suwimkan jukittawai 2 mijan epeknun egkemá. Nuwigtushkam waitkasbauwa duka akikbau atatui wajupa ati tusag chichaman egketdayau aina dusha apujinawa nuna.

Dutikamua nunú 14 mijanji jegachu aig aikamu ataik, yaki ánkae nunú suwinkan jikittawai 10 mijan epeknun egkemá, aantsag akikbau atatui wajupa ati tusag chichaman egketdayau aina dusha apujinawa nuna.

Art. 71.- Achika dutikamunum ejapjukbau

Achika dutikamunum ejapjukmataig, yaki takamsae duka jukittawai suwimkan articulo 65 wajintua imatiksag. Aantsag susattawai kuishkin wajupa ajapnatsua ejapjukua nunú inaamamunum, wajutik uyumtin wajase nui nagkamas uchigmat jegamunum, aiksag uchi akinawa nuna pensionkan susattwai.

CAPITULO IX: ADIJA KUICHIK JUWAMU

Art. 72.- Adiija kuichik jukitasa wekaetamunum

Ya wekaetawa nuniachkush ya ánmainajama tusa atuúniawa tikich adijku kuichik juta nunash, duka suwimkan jukittawai 4 mijan egkemá epeknun.

Art. 72-A.- Tsakat adiija kuichik juta nunú anentaimtuja wekaetamunum

Ya wekaetawa nuniachkush ya ánmainajama tusa atuúniawa tsakat kesh nuniachkush jamamtina dukesh adijku kuichik juta nunash, duka suwimkan jukittawai 6 mijan egkemá epeknun.

AWAJUN CHICHABAI JIIBAU

Art. 73.- Tsakat aig akiaku aikamunum

Yaki juna amastajai tusa suwak aents 14 mijan nagkamas 18 aja nuna aikawa duka suwimkan jukittawai 2 mijan epeknum egkemá.

Tuja aikamua nunú 14 mijanji jegatsaig dutikamu akuig, suwimkak sukagtusbau atatui juju chicham umikbauwa nui wajintua articulo 65 num nunú diisa imatiksaik.

Art. 74.- Adiiija kuichik juwamunum

Ya inamua, ya wekaetus egawa, nuniachkush nuwiya kuichik jininu juwawa articulo 72 wajintua nuwi iyak, duka jukittawai suwimkan 5 mijan epeknum egkemá.

Art. 74-A.- Tsakat adiiija kuichik juwamunum

Ya inamua, ya wekaetus egawa, nuniachkush nuwiya kuichik jininu juwawa articulo 72-A wajintua nuwi iyak, duka jukittawai suwimkan 10 mijan epeknum egkemá.

Art. 75.- Jaak ayawetkagtamunum

Artículos 72, 72-A, 73, 74 y 74-A batsakbauwa nua nui wajintu chicham umikbauwaita nui iya takabaunum ya waitkam awa nunú jakamtaig, suwimkan jukittawai dutikagtuauwa nú 15 mijan epeknum egkemá, aantsag akikmaktatui wajupa tusaiya Jintiinu emtin pataintinjaish uminkae nuna.

CAPITULO X: DATSAUMAINNUM EJEKAGTAMU

Art. 76.- Tsuúmain iwainmabaunum

Ya, paan wajantá nuniakuik juní buchittayame tusagkesh, achiimakagkesh, nuniachkush tuna nuniakug datsan wajainta nuna iwainmamkug jukittawai suwimkan 48 horas achikam egkemá.

Art. 77.- Tsakat aig muunta yujatai aina nui awaibaunum

Ya ayatak muunta yujatai aina nuwi uchi tsakata wainiatak awaiwa duka jukittawai suwimkan 30 tsawan epeknum egkemá.

AWAJUN CHICHABAI JIKBAU

Art. 78.- Wisú jiiinbauwa nunú uchi tsakat iwaintamunum

Yaki diijija pachis uchi anentai emestumaina nunin papii agakbaunakesh, wakani dakumka jukimunakesh jiiija iwainawa, nuniachkush, sukagtawa, duka suwimkan jukittawai 45 tsawan epeknum egkemá.

Art.78-A.- Tsakatchi iyashi iwainamunum

Yaki takakua, ya wekaetusag umuchiawa, tinamkagtawa, nuniachkush papii agakbaunakesh, wakani dakumka jukimunakesh jiiija dapampawa uchi wisú dakumkamun, duka suwimkan jukittawai 5 nantu epeknum egkemá.

Art.78-B.- Tsakat wakanmi dakumka jukitjai tusa iniamunum

Ya uchi tsakatchia nuna igkug nuniachkush iniak iyashmin wisu dakumkan jukitjai tawa, duka bakichik nantu suwimkan jukittawai epeknum egkemá, nuní anentaimjau ayatak ejechau akushkam.

TITULO VI

WAJI AIDAU UUMKA KASABAUNUM

CAPITULO I: UUMKA KASABAU

Art. 79.- Uumka kasabaunum

Yaki juwawa kasamak waji wajiig ainta nuna kakan wajatsuk nuniachkush awanmatsuk nuniak niinua iman ema takawa, duka jukittawai suwimkan epeknum egkemá 7 tsawan nuniak awagkittawai waji kasamkamua nuna akiken.

Ataktush patasag kasamkug wajuk suwimka jukiti tibauwaita juna nuniaush nuna juwak nuwigtush Jintiin timatai suwam atatui juniaunash muuntash wajuk suwimka susag eseyin ajabi nuna.

Art.79-A.- Batsatkamu wajiji kasamjamunum

Yaki batsatkamu wajijjin kasamua nuniachkush batsatkamu awetimua nuna jujawa dutikak niinua iman ema takawa, duka suwimkan jukittawai epeknum egkemá 2 nantu nuniak awagkittawai waji kasamkamua nuna akiken.

AWAJUN CHICHABAI JIIKBAU

Ataktush patasag kasamkug wajuk suwimka jukiti tibauwaita juna nuniaush nuna juwak nuwigtush Jintiin timatai suwam atatui juniaunash muuntash wajuk suwimka susag eseyin ajabi nuna.

Art. 80.- Takastasa uuka juwamu

Yaki wajiin niinuchu aig uuka juki waamak takas awakeawa duka suwimkan jukittawai 48 horas epeknum egkemá.

Art. 81.- Sujutai aina nunú uumka juwamunum

Yaki uumkash juwawa wajii sujuktina nuna, duka jutik suwimkan jukiu atatui:

- a) Waji S/. 1.00 nagkamas S/. 100 akike aina nunú juwamunmak suwimkak junaktatui 48 horas epeknum egkemná.
- b) Waji S/101.00 nagkamas S/500.00 akike aina nunú juwamunmak suwimak junaktatui 10 tsawankesh, nuniachkush 15 tsawankesh epeknum egkemná.
- c) Tuja wajii juwamua nunú S/501.00 nagkaesau juwamu ataik suwimkak junakiu atatui 15 tsawanta nunú awaktsuk, dutikakuishkam 1 nantua nunú uwaetsuk epeknum egkemá.

Yaki uumkash juwawa duka waji jukimua nuna akiken awagkiu atatui, nuniachkush nunú waji sujaku jumaina nuna awagkiu atatui, atsa nuniachkush, waji jujutuinashkuig nujai takáku wajupa kuichik jii-mainita nuna awagkiu atatui.

Ataktush patasag kasamkug wajuk suwimka jukiti tibauwaita juna nuniaush nuna juwak, nuigtush Jintiin timatai, juniaunash muuntash wajuk suwimka susag eseyin ajabi nuna jukittawai.

Art. 82.- Uumka tagku kasabau

Yaki tagku kasamua, jegá pujachu akush agagkesh wekagun duka suwimkan jukittawai 2 tsawan epeknum egkemá, nuniak tagkugtinun awágtuktatui wajupak kuishkin ajapae tagkujin egakush nuna. Kasamkauwa duka tagku kasamkamua nuna apujus pujakug awagtukiu atatui tagkugtina nuna. Nuniachkug kuishkinum awagkiu atatui tagku akikega nuna Jintiina nunú imán atí tibaunum. Ataktush patasag kasamkug wajuk suwimka jukiti tibauwaita juna nuniaush nuna juwak nuwigtush Jintiin timatai suwam atatui juniaunash muuntash wajuk suwimka susag eseyin ajabi nuna.

Art. 83.- Uumka ajanmaya tagku kasabaunum

AWAJUN CHICHABAI JIIKBAU

Yaki nii wakegamun umijmamkatatus kasamak juwawa atashnakesh, kuwinkesh, atsá nuniachkush waji tagkuk pipichikish ajanmaya ainta nunú wegantun, duka suwimkan jukiu atatuí 48 horas epeknun egkemá, nuniak akikmaktatui waji tagkun kasamkae nunú apatam jimag tagku akikega imanun.

Ataktush patasag kasamkug wajuk suwimka jukiti tibauwaita juna nuniaush nuna juwak nuwigtush Jintiin timatai suwam atatuí juniaunash muuntash wajuk suwimka susag eseyin ajabi nuna.

Art. 83-A.- Uuka ajanmaya tagku kasamsaik takasa awakeamunum

Yaki nii umijmamkatag tabaunum, atashnakesh, kuwinkesh, atsá nuniachkush pipish tagku wajig ainta nunakesh uumak juki bachik asa awakeawa duka jukittawai suwimkan 24 horas epeknun egkemá, nuniak awagtuktatui nejentin wajupa kuishkin ajape tagkujin wekaetak nuna.

Ataktush patasag kasamkug wajuk suwimka jukiti tibauwaita juna nuniaush nuna juwak nuwigtush Jintiin timatai suwam atatuí juniaunash muuntash wajuk suwimka susag eseyin ajabi nuna.

CAPITULO II: JAPIKI PAAN KASABAU

Art. 84.- Kasabau

Yaki aentsun kakantug nuniachkush awantuk wajin kasajua duka suwimkan jukittawai 6 nantu epeknun egkemá, nuniak awagkittawai wajii kasamkamu akikega nuna.

Ataktush patasag kasamkug wajuk suwimka jukiti tibauwaita juna nuniaush nuna juwak nuigtush Jintiin timatai suwam atatuí juniaunash muuntash wajuk suwimka susag eseyin ajabi nuna.

Art. 85.- Kasamku ayawetbau

Yaki kasamkush articulo 84 tawa nui jutik iwainmamak iyawa:

1. Magkagtutain takus kasagkagta nú.
2. Jimagkeh tsanig nuniachkush kuashtakesh ijunag kasagkagta nú.
3. Uchi tsakatnakesh nuniachkush aents jamamtin aina nunakesh kasaja nú.
4. Nuwanakesh, nuniachkush ejapjukunakesh kasaja nú.

AWAJUN CHICHABAI JIKBAU

Jujú utugchatnum wayá duka jukittawai suwimkan bakichik mijan epeknun egkemá, nuniak awagkittawai wajupa akik amainun jukie nuna, aantsag, Jintiin timatai suwam atatui juniaunash muuntash wajuk suwimka susag eseyin ajabi nuna.

Art. 85-A.- Wají sujutai aina nunú paan waintua kasabaunum

Articulo 85 wajintua nui iyá wajii sujutai aina nuna akike 1000 soles amainun, nuniachkush nuna nagkaesagkesh akik amaina nuna kasamuk jukittawai suwimkan bakichik mijan epeknun egkemá, nuniak awagkittawai wajupa akik amainun jukie nuna apaátua.

Tuja wají kasamkamua nunú akike 1000 soles jegashbaun dutikau akuig suwimkak sunasu atatui 6 nantu epeknun egkea, nuniak awagkittawai wajupa akik amainun jukie nuna apaátua.

Ataktush patasag kasamkug wajuk suwimka jukiti tibauwaita juna nuniaush nuna juwak nuwigtush Jintiin timatai suwam atatui juniaunash muuntash wajuk suwimka susag eseyin ajabi nuna.

CAPITULO III: KUNTIN MUUN TAGKUMTAI AINA NUNU KASABAU

Art. 86.- Kuntin muun tagkumtai aina nunú uuka juwamunum

Yaki nii umijmamkatnun bakanakesh, kuchinakesh, nuniachkush tuki tagku muun ainawa nuna niinuchu aig uuka juwa duka 3 nantu suwimkan jukittawai epeknun egkemá, nuniak awagkittawai wajupa akik amainun jukie nuna apaátua.

Ataktush patasag kasamkug wajuk suwimka jukiti tibauwaita juna nuniaush nuna juwak nuwigtush Jintiin timatai suwam atatui juniaunash muuntash wajuk suwimka susag eseyin ajabi nuna.

Art. 86-A.- Awagkitnaitak uuka kuntinun juwa nunú

Yaki, tuke juwachiatak, nii umijmamkatnun bakanakesh, kuchinakesh, nuniachkush tuki tagku muun ainawa nuna niinuchu aig uuka juki nii wakegamun takas awakeawa duka jukittawai suwimkan 7 tsawan egkemá epeknun, nuniak awagtuktatui nejentin jujú wekaetamunum kuichkin wajupak ajapae nuna.

AWAJUN CHICHABAI JIIKBAU

Ataktush patasag kasamkug wajuk suwimka jukiti tibauwaita juna nuniaush nuna juwak nuwigtush Jintiin timatai suwam atatui juniaunash muuntash wajuk suwimka susag eseyin ajabi nuna.

Art. 87.- Paan kuntin muun tagku kasabaunum

Yaki nii umijmamkatnun bakanakesh, kuchinakesh, nuniachkush tuki tagku muun ainawa nuna niinuchu aig kakankagtujagkesh, awanmasagkesh kasakagtawa duka bakichik mijan suwimkan jukittawai epeknun egkemá, nuniak awagkittawai wajupa akik amainun jukie nuna apaátua.

Ataktush patasag kasamkug wajuk suwimka jukiti tibauwaita juna nuniaush nuna juwak nuwigtush Jintiin timatai suwam atatui juniaunash muuntash wajuk suwimka susag eseyin ajabi nuna.

Art. 87-A.- Kuntin paan kasamku ayawetbaunum

Yaki kasamkush articulo 87 tawa nui jutik iwainmamak iyawa:

1. Magkagtutain takus kasagkagta nú.
2. Jimagkeh tsanig nuniachkush kuashtakesh ijunag kasagkagta nú.
3. Uchi tsakatnakesh nuniachkush aents jamamtin aina nunakesh kasaja nú.

Duka jukittawai suwimkan 2 mijan epeknun egkemá, nuniak awagkittawai wajupa akik kuntinush amainun kasamkae nuna apaátua.

Ataktush patasag kasamkug wajuk suwimka jukiti tibauwaita juna nuniaush nuna juwak nuwigtush Jintiin timatai suwam atatui juniaunash muuntash wajuk suwimka susag eseyin ajabi nuna.

CAPITULO IV: IINUCHU AIG JUWAMU

Art. 88.- linuchu aig atai juwamunum

Yaki nii umijmamkatag tusagkesh, tikichin susatag tusagkesh, waji najankamun, kuishkinakesh, nuniachkush waji mamiktuja ame uyumakam takasta tusa susamunakesh juki niinuwa nunin emawa, duka suwimkan jukittawai 6 nantua nuna ukujin awagtutsuk, nuniachkush bakichik mijana nuna inagketsuk epeknun egkemá, waji jukimua nuna akike 1000 soles nagkagas ataik, ániak waji jukimua nuna yamajman awagkittawai nuniachkush kuishkin waji jukimu akikega nuna diis awagkittawai.

AWAJUN CHICHABAI JIIBAU

Yaki nii umijmamkatag tusagkesh, tikichin susatag tusagkesh, waji najankamun, kuishkinakesh, nuniachkush batsatkamu takasti tusa awetimun juki niinuwa nunin emawa, duka suwimkan jukittawai bakichik mijana nuna ukujin awagtutsuk, nuniachkush jimag mijana nuna inagketsuk epeknum egkemá, waji jukimua nuna akike 1000 soles nagkagas ataik, aaniak waji jukimua nuna yamajman awagkittawai nuniachkush kuishkin waji jukimu akikega nuna diis awagkittawai.

Tuja waji jukimunakesh, nuniachkush kuichik jukimunakesh nigki nagkamas awagkimtaig suwimkak sutai atatui 7 tsawan epeknum egkea.

Ataktush patasag kasamkug wajuk suwimka jukiti tibauwaita juna nuniaush nuna juwak nuwigtush Jintiin timatai suwam atatui juniaunash muuntash wajuk suwimka susag eseyin ajabi nuna.

Art. 89.- linu aig juwamua nunú

Nejentin wajiin tsagkatkagtuku tsawan apusamua nunú jegatsaig juki awagkeauk suwimkan jukittawai 5 tsawan egkemá epeknum, nuniak wajii awagkimun awagsag susattawai yanak tsagkatkauwaita nuna, tuja nuniachkush kuishkinum awagkittawai, wajupa atí titig Jintiinush todayina nujai chichaman umiakush.

Art. 90- Tuke aneasa juwamunum

Yaki, waji megkaekau tabaun de kayatak etsegtsuk juwawa awagtsuk duka atanki sutai atatui yaki nejennaita nunú, nuniachkush nejennun akiku atatui waji akikega nuna.

Ataktush patasag kasamkug wajuk suwimka jukiti tibauwaita juna nuniaush nuna juwak nuwigtush Jintiin timatai suwam atatui juniaunash muuntash wajuk suwimka susag eseyin ajabi nuna.

Art. 90-A.- Wajii tsagkatkagtukbau awagtsug juwamunum

Yaki wajiin tsagkamak jukiu ayatak awaktsuk pujus niini jugamtikawa duka suwimkan jukittawai 7 tsawan epeknum egkemá, nuniak akikmaktatui wajii jukimua nuna akiken.

AWAJUN CHICHABAI JIIKBAU

CAPITULO V: JUKI AWAIBAU

Art. 91.- Juwamunum

Yaki wajii kasamkamu amaina nuna de kayatak juwawa, juki ukuawa, nuniachkush juki sujawa duka suwimkan jukittawai bakichik nantu epeknum egkemá.

Ataktush patasag kasamkug wajuk suwimka jukiti tibauwaita juna nuniaush nuna juwak nuwigtush Jintiin timatai suwam atatui juniaunash muuntash wajuk suwimka susag eseyin ajabi nuna.

CAPITULO VI: TSANUMJA KASABAU AIDAU

Art. 92.- Tsanumja kasabaunum

- a) Ya de kashmin bakichkish atsugmaitak nii umijmamkatag tau asagkesh, tikichin susataj tau asagkesh juju takatai aina duka midauwai tusa tsanumua, nuniachkush, nugkanakesh, jeganakesh, kuntinnakesh, atsa wajig amainaita nunakesh, juka midauwai tusa sukagtawa tikichin susau ayatak, duka suwimkan jukiu atatui 15 tsawanta nuna awaktsuk, nuniachkush 2 mijana nuna uwaetsuk epeknum egkemá, waji ibaunumag tsanumjamuita nú diigsa. Nuigtush awagtuktatui tsanugbauwa nuna wajupa emegkake imatiksag.
- b) Yaki tsanumas yaimta nuna anagmas kuishki jiiki uuka juwawa, nunik wajantá imaán yaimkajai tusa waitan papii patawa, nunitsuk papii pataachu akush ayatak yupiag wekaewa antumaina nuna etsegtsuk, duka jukittawai suwimkan 2 mijana nuna awaktsuk, nuniachkush 5 mijana nuna nagkaetsuk, nuniak awagkittawai jukimua nuna.
- c) Tuja nunú ainja emamunum takamsauwa nú awake anentaimag jukimua nuna wajiinakesh nuniachkush kuishkinakesh imatiksag, Jintiin yumigkagtatsaig awagkeakug, suwimkan jukittawai 5 tsawanta nuna awaktsuk, nuniachkush 10 tsawanta nuna nagkaetsuk.

Art. 92-A.- Tsanu iwishin

Tsuwajatchayaitak iwishnaitjai tusa tsanuma duka, jukittawai suwimkan jujui apusamunum wajintua nuna:

- a) Agaya akug jiiki ajapeam atatui, nuniak awagtuktatui kuishkin yanak tsanuje nuna.

AWAJUN CHICHABAI JIKBAU

- b) Awajun aents nuniakug, suwimka jukittawai 3 nantu epeknun egkemá, nuniak awagtuktatui tsanugbauwa nuna.

Art. 93.- Waitjamunum

Yaki waji niinuchu aig midau ainawai tusa sujawa, nuniachkush tsagakmua, duka suwimkan jukittawai 3 nantua nuna awaktsuk, nuniachkush bakichik mijana nuna nagkaetsuk, wajupa akik amainita waji anajmaka tibauwa dusha, nunú diisa. Nuigtushkam awagkiu atatui waji wainak niinuchu aig anajmakbauwa nuna, tuja nunú anajmasa sujakuikish, tsagakmkuikish kuichik jukimua nunashkam awagkiu atatui.

Ataktush patasag kasamkug wajuk suwimka jukiti tibauwaita juna nuniaush nuna juwak nuwigtush Jintiin timatai suwam atatui juniaunash muuntash wajuk suwimka susag eseyin ajabi nuna.

CAPITULO VII: UWAKAGTAMU

Art. 94.- Uwakagtuka aimkamtai jujamunum

Yaki kakankagtujagkesh, awankagtukagkesh bakichik aentsnakesh, nuniachkush estadon takajin aina nunakesh, atsa, ditak takau aina nunakesh kuishkin segáwa niinu atinun, nuniachkush tikichdau atinun, duka suwimkan jukiu atatui 8 nantua nuna awaktsuk, aniashkush 2 mijana nuna inagketsuk.

Art.94-A.- Uwaaka jujamua nuna ayawekji

Articulo 94 tawa nunú diyam antigbauwa duka:

1. Tsakat, nuniachkush jamantin
2. Muun chichin
3. Nuwa ejamtin

Nuniachkush yaki ainta nunú ipatikesh, ijuikish magkagtutai aina nuna takus antijata duka suwimkan jukittawai 2 mijana nuna awaktsuk, nuniachkush 3 mijana nuna inagketsuk, nuniak akiktatui yana iyashin emestuje nuna imatiksag, nuniachkush yana anentainum waitkase nuna imatiksag.

AWAJUN CHICHABAI JIIBAU

Art. 95.- Chanua uwaka tsupiamunum

Yaki ámek chichakaipa nuniakminig etsegtuktatjame ame nunitaigmin tusa chicham etsegmain ataish tsupijatua, dutikak tikich aentsnash tsupijua etsegmaina nuna, duka suwimkan jukittawai epeknun egkemá bakichik nantua nuna awaktsuk, nuniashkusk 6 nantua nuna inagketsuk.

CAPITULO VIII: NEJENCHAUWAITKU AKIINTAMU

Art. 96.- Nejenchauwaitku akiintamunum

Yaki bakichkish susashmaitak, nugkan, jegan, ajan, nuniachkush wajig ainta nuna niinuchu aig akiintawa, duka suwimkan jukittawai bakichik nantua nuna awaktsuk, nuniachkush 4 nantua nuna nagkaetsuk, nuniak awagkittawai ataimua nuna, aantsag akikmaktatui wajupa amain wajii tsuwapakbauwaita nuna.

Ataktush patasag kasamkug wajuk suwimka jukiti tibauwaita juna nuniaush nuna juwak nuwigtush Jintiin timatai suwam atatui juniaunash muuntash wajuk suwimka susag eseyin ajabi nuna.

Art. 96-A.- Nejenchauwaitku akiintamua nuna yawekji

Articulo 96 tawa nunú suwimak eketbau atatui jutik takamsamunum:

1. Kuchínakesh, bachitnakesh, akajunakesh juki uwakmak atankagta nunú, nuniachkush awanmak atankagta nunú.
2. Muunjima takatai ati tusa adaikamaitku takábaunum
3. Jimajkesh tsanigka nuniachkuish kawemkesh juúnika atankagtamunum.
4. Batsatkamu wajiji aidau atsumaku takatai ati tibauwa nú ataamunum.
5. Yujatai jinta, carretera, nuniachkush tesagdayamu aina nú pujujua akijua ataamunum.

Juniamunum wayauk suwimkan jukittawai epeknun egkemá 6 nantua nuna awaktsuk, nuniachkush bakichik mijana nuna inagketsuk, aantsag akikmaktatui wajupa amain wajii takamsamuita nuna.

Ataktush patasag kasamkug wajuk suwimka jukiti tibauwaita juna nuniaush nuna juwak nuwigtush Jintiin timatai suwam atatui juniaunash muuntash wajuk suwimka susag eseyin ajabi nuna.

Art. 97.- Entsa yaja saaki emamua nunú aikata tibauchu aig

AWAJUN CHICHABAI JIKBAU

Yaki nii umijmamatatus, nuniachkush tikichdau atinun takajak entsa yaja saaki emawa tikich aentsu emestak, duka suimkan jukittawai 7 tsawan epeknum egkemá, nuniak entsan ataktu awagkittawai yaunchuk atsuashia imatiksag.

Ataktush patasag kasamkug wajuk suwimka jukiti tibauwaita juna nuniaush nuna juwak nuwigtush Jintiin timatai suwam atatui juniaunash muuntash wajuk suwimka susag eseyin ajabi nuna.

Art. 97-A.- Kuchakesh piyaju emeseamunum

Yaki kucha piyag tuke aun ame dutikata tachabaitak, batsatkamu pamukji aina dusha dekaashbaunum emeseawa, duka suwimkan jukittawai 3 tsawanta nuna awaktsuk, nuniachkush 3 nantua nuna inagketsuk, nuniak akikmaktatui Jintiin yumi wajupa emesnaje nuna diis imán atí tibaunum.

CAPITULO IX: EMESEAMU

Art. 98.- Júnik emeseamu

Yaki emeseawa, antiawa, nuniachkush bakichik wajiinakesh, jeganakesh, nugkanakesh emeseg takamainchau emawa duka suwimkan jukittawai 48 horas egkemá, imatika emeskau achataik, nuniak awagkittawai wajii akiken emeskamua nuna.

Tuja senchi emeskamu ataik, yaki inamjae, yaki dekas takamsae, nuniachkush yajai ijunja dutikamukita duka ashi suwimak susagbau ágtatui 45 tsawantai epeknum egkea, nuniak awagkiu atatui waji emeskamua nuna akiken.

Art. 98-A.- Ayamjumsa pujutaiya nunú emeseamunum

Yaki tuke aneas, apeawa, emeseawa, maakchau emawa, wajiinakesh, jeganakesh nujai ayamjumsa pujutain, duka nuna akike 1000 solesa dukekesh jegachu ataik, suwimkan jukittawai 7 tsawan epeknum egkemá, nuniak awagkittawai wajig emesjamuita nuna, aantsag apusattawai wajig ainta nuna emestujagmatai megkaekamua nunashkam.

Tuja waji 1000 soles nagkagas akike au emesjamunmak yaki takamsae duka jukittawai suwimkan bakichik nantua nuna awaktsuk,

AWAJUN CHICHABAI JIKBAU

nuniachkush 3 nantua nuna inagketsuk, aantsag apusattawai wajig ainta nuna emestujagmatai megkaekamua nunashkam.

Tuja waji batsátkamu takataiji emesjamu ataik yaki takamua duka jukittawai suwimkan 3 nantua nuna awaktsuk, nuniachkush bakichik minaja nuna inagketsuk, aantsag apusattawai wajig ainta nuna emesjamtai megkaekamua nunashkam.

Art. 99.- Tagku tikichdau wait anentsa diyashbaunum

Yaki akanak juki tagkugtin dekatsaig, tsegasan apugtawa tagkun, nuniachkush waitkawa maatatus uuka apujus, duka tagku jakau, jakachu ataish, suwimkan jukittawai 3 tsawan egkemá, nuniak akikmaktatui tagku jakui tsuwamunum. Tuja tagku jakamtaig takamsa nunú akiktatui tagkugtinun.

Art. 99-A.- Tagku iinu aig idaibaunum, nuniachkush wait anentsa takashbaunum

Yaki tagku niinu aig tsegasan suwawa, nuniachkush wait anentus diyatsua, duka tagku jakau, jakachu ataish suwimkan jukittawai 7 tsawan epeknun egkemá.

TITULO VII

KUICHIK TSAGKAMKAMU AWAGKEASHBAU

CAPITULO I: TSAGKABAU

Art. 100.- Tsagkatkamaitak awagtan dakitamunum

Yaki ashi papii najaná kuichik tsagkatkamaitak, akikmatan dakitawa wajupa awagtunikmi tibaukita nuna, duka wajiji emetjam atatui ashi tujinkaik. Diwimam asa duka wajiin emetua nujai jugaktatui, Jintiin atus tibaunum, wajupa diwik awa nuna diis.

TITULO VIII

DEKASKECHU AIG TABAUNUM

CAPITULO I: TSANUMJA JUWAMU

Art. 101.- Midauwai tusa nugka sujidak aina nunú anajmamunum

AWAJUN CHICHABAI JIKBAU

Yaunchuk ejebau asamtai ashi dekamu aig, nugka kuntin aitai, tuna, tayu pujutai, ayamtai aina nuna pachis junak wii ejebaijai nudiau asa midauwai tusa tikich yujaschamin sujima duka, suwimkan jukittawai 3 tsawan epeknun egkemá.

Art. 101-A.- Midauwai tabauwa nuna ayawetkaji

Yaunchuk ejebau asamtai ashi dekamu aig, nugka kuntin aitai, tayu pujutai, tuna, entsa, namak, ayamtai, nuniachkush, tikich nugkash wajig ainta, nuna pachis junak wii ejebaijai nudiau asamtai midauwai tusa ajanakesh ajami, jetenkajinakesh jegamak, tikich yujaschamnín sujima duka, suwimkan jukittawai 15 tsawan epeknun egkemá, nuniak tsupigbau atatui nuní anentaimjamujiya nunú.

Jujú tabauwa duka, batsatkamunmayati yujagtai aina nuna tikich utsantuawai tusa bakichik jetenkakesh, numikesh pakai, dutik nugka iwainaka ukuamua nuna tatsui.

TITULO IX

INITIK MUUN UKUKBAUWA NUNÚ EMESEAMU

CAPITULO I: DELITOS CONTRA LOS BIENES ANCESTRALES

Art. 102.- Initik muun takajakbau emeseamunum

Yaki batsatkamu muunji aina nunú chichashbau aig, amuawa, tagawa, nuniachkush emeseawa kuntin egaka mautai aina nuna, tayu petsaak patamtai aina nuna, entsakesh nijá, yujag juuka yutai aina nuna, tuna wajá awa nuna, yumi sukutin aina nuna, kucha yumi piyajun, nuniachkush wajig jumamtin amainita nú aidauwa nujai chichiasa pujutai aina nuna, duka suwimkan jukittawai 15 tsawanta nuna awaktsuk, nuniachkush 45 tsawanta nuna uwaetsuk. Nuniak juna jutikaush wajupa akikmakti titiig Jintiinush nunú uminkau atatui.

TÍTULO X

KUISHKIJAI YAPAJIAMUNUM TSANUBAU

Art. 103.- Kuwashtajia nunú uwaetamunum

AWAJUN CHICHABAI JIKBAU

Yaki imaán kuashat aig awagkeawa, uwaewa, nuniachkush yapajiawa kuwashtajia nuna, pegkegiya nuna, kijinjiya nuna, atsa, wajii wegkantinakesh, esantinakesh suma nuna dutik atantak, duka awagtuktatui kuishkin wajupa jujukie uwaekash nuna.

Paták aniamu ataik 24 horas suwimkan jukittawai egkemá, nuniak awagkittawai kuishkin wajupa jukie uwaekash nuna.

Art. 104.- Imán akik atí tusa batsakbaunum umikbauwa nunú uwaetamunum

Wajupa akik sudaisattaji yutai aina nú sujakuish nunak bakibakichik batsatkamunmaya diis apujmain ainawai dutikatag takug. Iman sujukmí tibauwa nuna uwagak nii wakegamun akikan chichajuk suwimkan jukittawai 24 horas egkemá, nuniak akikmaku atatui S/50.00.

Jujú chichama juka imán yutai aina nuna akike atí tusa batsatkamunum umikchamu asamtai ayatak bakibakichik aents suja nuna akiken apusamtai sumana nuna tatsui.

Art. 105.- Anenkai wajii sukagtusbau sujamunum

Yaki anenkai wajii estadokesh, nuniachkush yaki ainta dukesh wainka sukagtusbauwaita nuna suja duka jukittawai suwimkan 3 tsawanta nuna awaktsuk, nuniachkush 3 nantua nuna uwaetsuk waji akikega nunú diigsa. Nuniak kuishkinum awagtuktatui yanak sujutkae nuna waji akikega imatiksag.

Art. 106.- Nunimainchau asamtai sujukchamu atí tibauwa nunú umka sujamunum

Yaki juju waji aina duka sujukchamu atí tusa batsatkamunum umikbauwa nuna uúk sujawa duka suwimkan jukittawai 48 horas awaktsuk epeknun egkemá, nuniachkush 7 tsawan uwaetsuk, Jintiinush wajuk anentaimtug diisaya titatua nunisag.

TITULO XI

BATSATKAMU ANENJAS PUJUMAINCHAU AWAGMAMU

AWAJUN CHICHABAI JIIKBAU

CAPITULO I: ISHAMAINNUM AWAIJATBAU

Art. 107.- Apejatmain ishamain dutikamunum

Yaki tuke aneas apejatmaina nuna wainiatak jii ekemawa, duka suwimkan jukittawai 15 tsawanta nuna awaktsuk, nuniachkush 6 nantua nuna uwaetsuk, nuniak tunak apeawa nuna awagkitin, aantsag ikama apeau akug ajakmaktin; tuja nuna nunimainchau ataik akikmaktin wajupa emesmake nuna, juna diisash Jintiinush wajintig imatiksag.

Art. 108.- Droga bukunaikesh, nuniachkuish nampekaikesh anunbaunum

Yaki carronakesh, namaka yujatai motorjai aents yajuaka ematai aina nunakesh anuntiatak droga bukuna, nuniachkush nampek anuntua, duka suwimkan jukittawai 48 horas epeknum egkemá.

Art. 109.- Akaju iwajtuka ukuamunum

Awajuni nugkenig akujú kuntin maatasa iwajtuka ukuamua duka atsuttawai yabai nagkamsag. Jujú chichama nuna antachuk suwimkan jukittawai 48 horas epeknum egkemá, nuniak akikmaktatui 500 soles. Iwajtuka ukukbauwa nunú wainkuik jujuki tsaika ajaptai atatui.

Antsag yabai nagkamsag jii najana atsejuka jijui iju namak kajeamua dushakam atsuttawai awajuni nugkenig. Jujú chichaman uwaguk jukittawai suwimkan 48 horas epeknum egkemá. Jii najanamu, jiju namak ijutin najanamu aina duka yajuaka tsayamu atatui.

Art. 110- Akajú nagkaesau batsatkamu muunji dekaashbaunum takakbau

Yaki akaju kuntin maá yutaiya nuna nagkaesaun uuka ikamkamun takakua duka atantam atatui dutika tsaika ajapjam atatui.

Art. 110-A.- Nampeka ayatku akaju ipattai aina nunú takamunum

Yaki nampeka ayatak akajun takawa wainka dutikataj tukamá tukujatmain aig, duka jukittawai suwimkan 48 horas epeknum egkemá. Ujakbau ayatak ataktush patasag aniakug akikmaktatui 100 soles.

AWAJUN CHICHABAI JIIKBAU

CAPITULO II: YUJATAI, CHICHAM AWEMATAI TUTIT AWAJMAMU

Art. 111.- Aents yajumtai aina nunú tutitag awajmamunum

Yaki namaká shimamunum, kukag shimamunmakesh aents yajumtai aina nuna tutitag awajmak pujut megkaemaina nuninum awaikagtawa, duka suwimkan jukittawai 4 nantua nuna awaktsuk, nuniachkush 1 mijaná nuna uwaetsuk, nuniak akikmaktatui wajupa emesjae wekaetaiya nuna.

Art. 111-A.- Pachiakchamu bakumamunum (nuniktajai tichamunum)

Namaká, nuniachkuish kukag wekaekuish diisa yujasmi tusa iwainajbau aig, nuna diitsuk tukujatbaunum bakumamu jegamtaig, yaki tukujatie, nunú empresa akug nuna buuke, nuniachkush yakita nejennush nunú akikmaku atatui wajupa kuichik ajapnattawa tsuwamamunum, waji besejbaunum, iyash emeseamunum, nuna.

Art.112.- Dékashbaunum anunta nunú yapajiamunum

Yaki nejentin dekaashbaunum, nuniachkush susashbaitak namakagkesh, kukagkesh anunka wekaetai aina nuna juki takawa nii wakegamun umijmamkatatus, duka suwimkan jukittawai 24 horas epeknun egkemá, nuniak akiktatui nejennun 100 soles wainka takamsamunum.

CAPITULO III: JATA PUJUT ITAMUNUM

Art. 113.- Takatai, yutai aina dukesh emeseamunum, nuniachkush nunú aina nuna tsawanji yapagtua apujbaunum.

Yaki takatai aina nuna, yutai aina nuna emeseawa, nuniachkush nunú aina nuna tsawanji nagkaechamua nuninun yapagtua apujua, duka suwimkan jukittawai 48 horas epeknun egkemá, nuniak akiktatui antigka nuna 500 soles.

Art. 113-A.- Ampimatai aina nunú emeseamunum nuniachkuish wainka páchibaunum

AWAJUN CHICHABAI JIIBAU

Yaki ampimatai aina nuna emeseawa, nuniachkush pachimua, aantsag tsawanji nagkaechamua nunin awajus apujua, duka suwimkan jukittawai 20 tsawan epeknum egkemá.

Art. 114.- Jata ishamain utsujatmain aina nunú uyujbaunum

Yaki jata ishamain ayatkushkam ampimakuik tsagaumain aina nuna achii mak wekaeyatak uuk wekagas dijigmak utsujatua, duka suwimkan jukittawai 7 tsawanta nuna awaktsuk, nuniachkush 15 tsawanta nuna uwaetsuk, nuniak ampiam atatui epeknum egkemá pujus.

Yaki, VIH ajamun de kayatak nunik utsujatua, duka suwimkan jukii atatui 1 mijana nuna awaktsuk, nuniachkush 5 mijana nuna uwaetsuk epeknum egkemá, nuwi pujus ampijatín tsuwam atatui.

Art. 115.- Tsuwajatut dekachiatku ampijatbau

Yaki medico achayatak, nuniachkush tsuwajattan unuimaju achayatak ampijatna imanís tsanumag antujam awa nii timatai tsuwamagtasa, duka suwimkan jukittawai 15 tsawan epeknum egkemá.

Art. 116.- Etsaegkagtina iman wantinbaunum

Yaki wika tsuwagtatjame tujutmatai tsuwamakmá ayawetnum ejekagtawa, duka suwimkan jukittawai 2 semana epeknum egkemá.

Art. 117.- Initikia muun tsuwamajakbaun dekajai tusa waitjamunum

Yaki wika initikia muun tsuwamajakbaun dekajai nudiau asan tsuwagtatjame tujutmatai tsuwamakmá ayawetnum ejekagtawa, duka suwimkan jukittawai bakichik nantu egkemá, nuniak akikmaktatui 3000 soles.

Nuniamunum tsuwáma nunú jakamtaig waitjua nú suwimak susamu atatui jujú chicham artículo 20 num umikbau diisa.

Art. 118.- Coca, marihuana aina nunú batsatkamu nугkén ajakmamunum

Batsatkamu muunji atí tusa adaijamu aina duka, coca, marihuana aina nunú batsatkamu nугkén ajaámu wainkug, tegag utsagtatui estado policiajjai atuetuk. Tuja yaki patasag takamua duka suwimak susamu atatui 2 mijan epeknum egkea.

AWAJUN CHICHABAI JIIKBAU

Art. 119.- Droga najanka takamunum, nuniachkush ijumja batsamunum

Yaki najanua drogan, nuniachkush ijumua nuna najanak, duka suwimkan jukittawai 2 mijan epeknum egkemá.

Art. 120.- Droga sujamunum

Yaki sujawa, nuniachkush chichamjawa droga naneka bukuntai emaka sujuta nunash, duka suwimak suwamu atatui bakichik mijan epeknum egkea.

Tuja yaki dekas aan nagkaemas drogan sujak wekaetawa magkagtin aina nujai ijunag, duka, Codigo Penal wajintua nuna umikti tusa apachnum esetaiya nui awemamu atatui.

Art. 121.- Droga bukunbaunum

Yaki drogan bukunua, nuniachkush uuka ukuawa niinu atinun, atsa, tikichdau atinnakesh, duka suwimkan jukittawai 1 nantu egkemá epeknum, nuniak susamu atatui anentain sumamsati tusa initik muun ajakan umú ajakua nú.

Art.122.- Droga bukunati tusa anentai suwamunum

Yaki droga ajamu akush, atsujbau akush, dekas jujú bukunbau amainai tusa umushkagtawa, duka suwimkan jukiu atatui 7 tsawan epeknum egkemá.

Tuja suwimak susamaitak patasag takama duka, yakinchijin chicham wajintu umikbauwaita nunú suwaku, muuntash chichaman antachunash wajuk suwimka suuk ajabi nunú apugtustin, Jintiin juna pachisash wajintig imatiksa.

TITULO XII

BATSAMTAI TSUWAPAMU

CAPITULO I: TSUWAPAKA EMAMUNUM

Art. 123.- Batsatkamu nugke tsuwapamunum

AWAJUN CHICHABAI JIKBAU

Yaki tsuwatan ajapeatsua juwi utsautai ati tusa mamikjamunum dutikak batsatkamu agajin, jintanum nuniachkush carreteranum tsuwapak emawa, duka suwimak susamu atatui 24 horas epeknum egkea, nuniak akikmaktatui 50 soles. Ataktush patasag tsuwapakug suwimak susamu atatui bakichik tsawan batsatkamu agajin takagsati tusa.

Art. 124.- Esak japiki jutaiya nunú tsupigbaunum

Yaki nigkikesh, jimagtukagkesh esak japiki jutaiya nuna tsupiawa, nuniachkush awati emeseawa, dutikak entsan, nugkan tsuwapawa, duka suwimkan jukittawai 5 mijan epeknum egkemá, ashi ya aidau pachintukaje duka imatiksag.

Ataktu patak takamkug apach chicham esetainum sujukbau atatui.

Art. 125.- Namak tsegas ajuntua tsuwapamunum

Yaki namaknum kuitan, tsegasan ajuntua nuniachkush wajig ainta initik muuntaish takaschamun takawa namakan emeseak, duka suwimkan jukittawai 20 tsawan epeknum egkemá, nuniak akikmaktatui 500 soles.

Antsag, yaki sukagtawa kuitan, tsegasan dushakam suwimak susamu atatui bakichik nantu epeknum egkea, nuniak akikmaku atatui $\frac{1}{4}$ UIT.

Art.125-A.- Namak timui, nuniachkuish wajig ainta nujai nijamunum aikata tusa tachamaitku

Yaki namakan timui, atsa, wajig ainta nujai nijawa aikata tusa tichamaitak, nuniachkush tsawan apugsa kuitabauwa nuna intimjuki, duka suwimkan jukittawai 48 horas egkemá.

CAPITULO II: IKAMIA JUUKMATAI AINA NUNU EMESEAMUNUM

Art. 126.- Jutikami tichamu aig kuwi takaaku nugka emeseamunum

Estadokesh papii susa awemashmaitak, atsa, batsatkamunmakesh iniimsa dekabau aig kuwi jukitjai tusa, nuniachkush wajig jiju jiiitai ainta nunú jukita tusa awajuni nugken uumka takábauk, suwimak juní sukagtutai atatui:

AWAJUN CHICHABAI JIIKBAU

- a) 1 mijan epeknum egkemá.
- b) 150 UIT akikmak ayamjumsa pujutai aina nunú emeseamunum, dutikak batsatkamu nugke emeseamunum akikmaktatui.

Estado papii susam takaidayatak umitsuk takaina duka jutik iwagtai atatui:

- a) Shiiash dekas ikaman, namakan emesjashtajai tibauwa nunash imatiksagkeash takaina nunú diintsati tusa papii egketbau juna diin aina nui.
- b) Shiig takashbau wainkuik jimagtuka Estadojai chicham egketuamu atin suwimak jutaiya nui.
- c) Maanitkatin nugka emesjamunum akikmamu ati tusa.

Art. 126-A.- Kuwi takainak nugkan emesenakui takamuji aina nunú tsaiktag tajin jinta epetkagtamunum

Kuwi takainak nugka emesenakui takamuji aina nunú tsaigkatag tusa wejamunum, batsatkamu aentsji aina nunú uchi jijagkesh, nuwa ejamtinum emtijagkesh, nuniachkush jumamtinun utugchatan apujainak waintua tsaigkashmin wajainakuishkam, tutupin mamiktai atatui dragajtin aina nunú. Juniamu wainkuik chicham egketuamu atatui fiscalianum, nuniaku papii chimpituamu atatui estado apuji aina nui.

Art. 126-B.- Magka dijauwai kuwi takamunum

Tikima kuwi takaji tusa depetkashmin magka diijai takainak, tikima nugkan emesek emaina duka chicham egketuamu atatui estado inamtaiji juna diin aina nui, dutikaku bakin tsaijamu ati tusa sumankattawai, aantsaik chicham egketuamu ágtatui apachnum suwimak sukagtutai aina nui, batsatkamu senchijijai atuetuka.

Art. 127.- Kuwi takantsashti tibau aig wakenmataik batsatkamu muunji aina nujai atueka takamunum

Batsatkamu pamukji emesmainun wainiatak juwi takastajum tusa nugkan tsagkama duka suwimkan jukittawai 2 mijan epeknum egkemá, nuigtushkam akikmaku atatui 5 mil soles.

AWAJUN CHICHABAI JIIBAU

Art.128.- Kuichkin jukitag tau asa kuntin achika yajuaka sujamunum

Yaki kuntin ikamian achik juwawa, sujawa, yajuak emawa, nuniachkush ijumua sujuktaj tau asa, duka suwimkan jukittawai bakichik nantu epeknum egkemá, nuniak akikmaku atatui 500 soles.

Art. 129.- Amuamunum

Yaki kuntinun kajeawa, achiawa, ijumua, nuniachkush wajuk tukig atsumajai tusa awajun nugkanum pujus yajumua ajaka kagkape aidaun, ajak aidaun, kuntin aidaun nuna yajuak sujuktatus papiiji jiitsuk, duka suwimkan jukittawai bakichik nantu epeknum egkemá, nuniak akikmaktatui 1000 soles. Jujuka atsumaku kuntin maa sujutia nuna tatsui.

Art. 129-A.- Numi uumka sujamunum

Yaki papiin jijmamchayaitak, estadonakesh, batsatkamunakesh segatsuk numin kuashat tsupig sujawa, duka suwimkan jukittawai 20 tsawan epeknum egkemá. Nui ataktu patak takamkug suwimkan jukittawai 30 tsawan epeknum egkemá, nuniak akikmaku atatui 500 soles. Uumka numi tsupigbauwa nunú yajutkamua duka batsatkamush tuna atsumainawa nui awemamu atatui.

Aantsag, yaki sumawa numi uumka tsupigbaun de kayatak, duka numi yajutka tuwiya batsatkamunmayag jiinkie nunú awagtutai atatui dita atsumamun takastinme tusa, nuigtushkam akikmaku atatui 10 UIT.

Art.129-B.- Magka diijai numi tsupija sujamunum

Numi uuka sujina nuna muunjiya nunú iyakug suwimkan jukiu atatui 10 mijan egkemá, nuigtushkam akikmaktatui 250 UIT. Numi tsupigbauwa duka yajuaka sutai atatui batsatkamu nii atsumamun takasti tusa. Juka apach chicham iwagtainum emamu atatui chichasa emetmainchau diyamu akuig.

Art. 130.- Nugka wasugsa diyamunum, nuniashkusk tikich tsagkatbaunum

Batsatkamu ijunjamunum dutik umikchamu aig, yaki nú batsatkamunum pujuchun, nuigtush awajunkesh átsaig nugkan takastá tusa kuichik akiam tsagkatkagtawa yujumak ukuata tusa, nuniachkush ajak ukua sujukta tusa, duka suwimkan jukiu atatui 6 nantu epeknum egkemá, nuniak chichajam atatui.

AWAJUN CHICHABAI JIKBAU

Ataktu patak aniakug batsatkamunum puja nunú jiiki ajapeam atatui, dutikaku nugkak batsatkamunum pujuúsh yaki atsumawa nunú susamu atatui.

Art. 130-A.- Ikam achikchamua nunú inimtsuk takamunum

Yaki batsatkamu muunji dekaashbaunum, nugka achiawa awajunti nugke tusa kuitamtaí aina nuna, duka suwimkan jukittawai 7 tsawan epeknum egkemá. Nunú nugka duka awagtukbau atatui dutikaku batsatkamu daajin kuitamtaí atatui. Nuigtushkam takamsa duka numi maamunum yamajam numi tsapaktata nuna ajakmaktatui.

Art. 131.- Nugka sujamunum

Batsatkamu nugkén pujayatak nii takas pujusti tusa susamua nuna tikich aentsun ijutkamu pujachunak, awajunkesh achaun susamtaig, esakatjamu atatui sujukbauwa nunú, dutikaku 45 tsawan suwimak susamu atatui epeknum egkea.

CAPITULO III: BATSATKAMU PAMUKJI AIKMAINCHAUN TAKAKUI

Art. 132.- Batsatkamu ijunag chicham umikchamu aig pamukua nunú wainak takábaunum

Pamukua nunú batsatkamunmaya ijunag chicham umikchamu aig nigki nugkan aents iiniachun, nuigtush nuwi pujuchun suwa duka jikbau atatui nii pamuk pujamujiya nú. Ijunja chicham umikchamu aig nugka wasugkamamua duka esakagbau atatui.

TITULO XIII

BATSATKAMUNUM SHIIG BATSAMTAIYA NUNA EMESTAU

CAPITULO I: SHIIG BATSAMTAIYA NUNU EMESEAMUNUM

Art. 133.- Pachimkagtamunum

Yaki kuashat juunik aentsu achik suwimainawa, nuniachkush papii takataí aina nuna, jéga batsamtaí aina nuna emesenawa, duka

AWAJUN CHICHABAI JIIBAU

suwimka jukittawai 15 tsawan epeknun egkemá, nuniak iwajattawai wajupa takamsamuita nuna.

Tuja jujú takábaunum aents jakamtaig, wajupak yujasajuita suwimkagtuinakush duka imanisag suwimak susagbau atatui art 18 jujú papii umikbaunum chichá nú diisa.

Art. 134.- Chicham pachibaunum

Yaki dekaskechu aig etsejak chichaman pachimua, duka suwimka jukittawai 48 horas egkemá.

Art. 135.- Tutitag awajkagtamunum

Yaki maniawa wainainamunum, nuniachkush awankagtawa kuashat antamunum, yaki ishinka takatai aina nuna ishinkagkesh chajatmitkawa, senchi untsamak shinawa, kanta aina nuna ishinak ashi senchijin apujtus tugketmitkawa dakitmainun, nuniachkush yawayi dakitmain shinú pujaig itatmitkatsuk ayatak diyawa, duka suwimkan jukittawai 48 horas egkemá.

Art. 136.- Dewakbau aig jetemjamunum

Yaki, paan antuinamunum maakchau anentai aina nuna, takamsamu aina nuna ayamjus chichawa, duka suwimkan jukittawai 10 tsawan epeknun egkemá.

Art. 137.- Magka diijauwai ijunjamunum

Yaki umuchkagtawa, ijumkagtawa, magka anentaiyai kumpatum aentskesh juunikag aan nagkaemas kawenak, kasamta nuna, magkagtuta nú anentaiyai takainawa, duka suwimak susamu atatui 10 mijan epeknun egkea.

Ditanunmaya pachitka nunú magkagtuinakug, suwimka jukittawai dita apujiya nunú, magkagtua dushakam 15 mijan epeknun egkemá.

Art. 138.- Íjutkamunum

Yaki magka atina nuna yaimak chichaman juwawau wekaewa, niimkau awa, wekaekagtawa, ishinka wekaetai aina nuna tsagkatkagtawa, nuniachkush wajuk atujatuaki takamsatna nunú

AWAJUN CHICHABAI JIIKBAU

umiaku wekaetamunum, duka suwimka jukittawai dekas takama dusha wajupa tsawan jukiti tibauwaita nuna jimaipitukjiya nuna.

CAPITULO II: JAKAU AINA NUNÚ AJANTUSA DIYASHBAU

Art. 139.- Ukunch, iyash aina nunú sujamunum

Suwimkan jukittawai 3 mijan epeknun egkemá, nuniak akikmaktatui 5 UIT, yaki:

1. Aents jakau ukunchin ashií juwawa, ukunchin juki emawa, ukunchin sujawa, nuniachkush, sujukbaunum kuishkin juwawa.
2. Aents jakau iyashi aina nuna juki emawa, sujawa, nuniachkush sujukbaunum kuishkin juwawa.

Art. 140.- Jakau aina nunú ajantashbaunum

Iwaku pujawaitkuish ajantusa diitsuk aents jakauwa nunú dushiksa diyamunmakesh, ukunchkesh jiija nagkimka ukuamunmakesh iyakuik, suwimak jukimu atatui 15 tsawan epeknun egkemá.

TITULO XIV

AENTSU AYAMKE NAJASA DIYAMUNUM

Art. 141.- Suwiibaunum

Batsatkamu pamukji, nuniachkush nii inamjamunum, aents suwiibaunum, anentaimtikaku waitkamunum iyakug, suwimkan jukittawai 15 tsawan egkemá epeknun, nuniak akikmaktatui 1/5 UIT.

Art. 142.- Aagkagtamunum

Yaki nigki nagkamigkesh, nuniachkush tikichin inajagkesh aagka diijatua, dakitkagtus diijatua, jinta epetkagtawa, atsa, tikichin eme anentak idaikagtawa paan shiig anentaimainchaunum ekagtak, bakishkitinakesh, ijumjagkesh, duka suwimka jukittawai 48 horas epeknun egkemá.

Nunisag seetsuk aagkagtu wekaekug suwimkan jukittawai 15 tsawan epeknun egkemá.

AWAJUN CHICHABAI JIIKBAU

TITULO XV

AWAJUNTIN TUTITAG AWAGKAGTAMUNUM

CAPITULO I: AWAJUNI PUJUTJI EMESTAMUNUM

Art. 143.- Nugke antinbaunum

Yaki awajuni nugke, ikamji, namakji aina nunú aik takamak megkaemaina nuna wainiatak tiikichin ashi atakuawa, nuniachkush tsupik awajuni nugke akanmaina nuna wekaetawa, duka suwimkan jukittawai bakichik nantua nuna awaktsuk, nuniachkush 6 nantua nuna uwaetsuk. Ataktush patasag nunak wekaetakug atakesh takatak sutai achatnai awajun nugka nua nuig.

Art. 144.- Maanitan itau

Yaki akatkagtawa, umuchkagtawa, ijumkagtawa, nuniachkush jutí jutik awajuni nugken batsatkamu aina nui maanita nuna itaáwa, duka suwimkan jukittawai 45 tsawan epeknum egkemá.

Art. 145.- Nugka dakaapa ajiamu yumpuamunum

Yaki nugka dakapa ajigbau aina nuna umuchiawa, atsa, yumpuawa nugka awajunti nugkeg juwi nagkanui tibauwa nuna, nuniachkush batsatkamu nugkeg juní atí tibau aina nuna, duka suwimka jukittawai 15 tsawan epeknum egkemá, nuniak iwajata ajigbau emeskaum nunu tusa tabau atatui.

Art. 146.- Awajún tsaiktasa wekaetamunum

Yaki dekamak tikich aents aina nujai wayá awajunti batsatag nuna umuchik Gobierno Territorial Autónomo awajunti najanamua nuna tsaiktatus wekaetawa, duka suwimka jukittawai epeknum egkemá 3 nantua nuna awaktsuk, nuniachkush 8 nantua nuna uwaetsuk.

CAPITULO II: GTAA TAKATJI EMESTAMU

Art. 147.- Jetejatbaunum

Yaki GTAA jutik anuntai ati tibauwa nuna pachimjawa takatan, ju takastinme tusa adaijamu aina nuna jiiktatus, nuniachkush niimjin yapagtuatatus kakantua, duka suwimkan jukittawai 3 nantua nuna awaktsuk, nuniachkush 8 nantua nuna uwaetsuk. Ataktú patasag

AWAJUN CHICHABAI JIKBAU

nuniakug yama nagkamchak aniaush wajupa tsawan suwimka jukiti tibauwaita imatiksaik apaatua suwimak sutai atatui.

Art. 148.- Maanitbaunum

Yaki ekenbau aina nuna shiig takaschamin awajua, takatash shiig emashmin kakankagtawa, nuniachkush pamukkesh, kakajmakesh, atsa, ya ekentaj tabaunakesh epettatus wekaetawa, duka suwimkan jukittawai 3 nantua nuna awaktsuk, nuniachkush 8 nantua nuna uwaetsuk. Ataktú patasag nuniakug yama nagkamchak aniaush wajupa tsawan suwimka jukiti tibauwaita imatiksaik apaatua suwimak sutai atatui.

Art. 149.- Tuwajbaunum

Yaki juunikagkesh awajunti ayamke pachis jujú takat dutikata tusagkesh, nuniachkush juka dutikawaipa tusagkesh jutik takantsati tibauchu aig dita wakegamua nuna pachis utugchatan apujuinak senchi kakankagtuinawa, duka suwimkan jukittawai 3 nantua nuna awaketsuk, nuniachkush 8 nantua nuna uwaetsuk. Ataktú patasag nuniakug yama nagkamchak aniaush wajupa tsawan suwimka jukiti tibauwaita imatiksaik apaatua suwimak sutai atatui.

Art. 150.- Jetejatbaunum, maanitbaunum, tuwajbaunum wakenmataik yaimaunum.

Yaki jetejatbaunum, maanitbaunum, tuwajbaunum pachiinak wakenmataik yaimua duka suwimkan jukiu atatui 3 nantua nuna awaktsuk, nuniachkush 8 nantua nuna uwaetsuk. Ataktú patasag nuniakug yama nagkamchak aniaush wajupa tsawan suwimka jukiti tibauwaita imatiksaik apaatua suwimak sutai atatui.

TITULO XVI

EKENBAUWA NUNU WASUJKAMA EMEGKAMUNUM

Art. 151. Awajunti ekendaiyamunum epetkagta nunú

Yaki utugchatan apujak, nuigtush awankagtak, muunjima takastin aina nunu ekenmi tabaun wainak kakaak tsuwapawa, duka suwimak susamu atatui epeknun egkea 7 tsawanta nú awaktutsuk, nuniachkush 15 tsawanta nuna uwaetsuk.

AWAJUN CHICHABAI JIIKBAU

Art. 152.- Ekentasa ajapeamunum yajupkagta nunú

Yaki akikmak, nuniachkush pegkejan anagkagtua, amek ajapawaipa tukagtawa, nuniachkush aik ajapata tusa tukagtawa, duka suwimkan jukittawai epeknun egkemá 7 tsawanta nuna awaktsuk, nuniachkush 15 tsawanta nuna uwaetsuk.

Art. 153.- Wií ekemtajai tawa nunú jutik ajapata tukagtamunum

Tsawan jegamtai ajapeamunum, wií ekemtajai tau asa takamak articulo 152 jujú papii umikbaunum wajintua nua nui iyakug, jukittawai suwimkan epeknun egkemá 7 tsawanta nuna awaktsuk, nuniachkush 15 tsawanta nuna uwaetsuk.

Art. 154.- Jutik ajapattajai tusa iwainamunum

Yaki tajimat nugkan anunkatna nunú ekenbaunum, nuniachkush GTAA munji aagtata nunú ekenbaunum wika nuna ajapjuattajai tusa paan iwainak tawa, duka suwimkan jukittawai 24 horas epeknun egkemá.

Art. 155.- Ajapeamunum wainka wasujkabau

Suwimkan jukittawai epeknun egkemá 7 tsawanta nuna awaktsuk, nuniachkush 15 tsawanta nuna uwaetsuk:

1. Ajapashbau aig tsentsaká awaya nunú, nuniachkush ajapamun esaka nunú.
2. Ajapamu dekapakbauwa imatikas tsanuma nunú, nuniachkush ashikesh, ujumkesh ajapamu agaka inagkeagbauwa nuna tsaya nunú.
3. Ajapamu chimpiamua nuna yajuak utsá nunú, nuniachkush tikichin yapajia apuja nunú.

TITULO XVII

BATSATKAMU TAKATJI TSUWAPJAMU

CAPITULO I: TIKICH AENTS AIDAU TAKAMSAMUNUM

AWAJUN CHICHABAI JIIKBAU

Art. 156.- Muunjimamu takatji ataamunum

Yaki adaikashmaitak tsanumag takawa, nuniachkush nii atakuashmawaitak atai takawa, duka suwimkan jukittawai 15 tsawan epeknun egkemá.

Art. 157.- Wainka anajma tsanumja wantinbau

Yaki paan iwainmamua wika juuwaitjai tusa tsanu papii juki bakichkish aan takasta tusa adaikashbauwaitak, nuniachkush papii ausauwaitjai tusa namukjichu aig iwainak tsanumua, duka suwimkan jukittawai epeknun egkemá 7 tsawanta nuna awaktsuk, nuniachkush 15 tsawanta nuna uwaetsuk.

Tuja, wainak adaikashbau ayatak witjai adaikamunuk tusa niiskaitai tumain batsatkamunum adaikamua iman wekagas tsanumak papiinash najana sukagta duka suwimkan jukittawai epeknun egkemá 3 nantua nuna awaktsuk, nuniachkush 8 nantua nuna uwaetsuk.

Art. 157-A.- Tsuwajatin wainjashbau aina nunú

Tsuwajatnai tusa batsatkamu muunji aina dukesh iwainakchamaitak dekáshbaunum tsuwajatjai tusa puja duka suwimkan jukittawai 15 tsawan epeknun egkemá.

Art. 158.- Papiiígtinchauwaitku unuimajujai betek takastag tabaunum

Yaki tsanu papii jijmamki unuimajua iman wee takawa, duka suwimak susamu atatui epeknun egkea 3 nantua nunú awaktutsuk, nuigtushkam 6 nantua nunú uwaetsuk.

Art. 159.- Papii unuimagbauji atsujaig atamunum

Unuimaju namukjinna nunú, tikichin papii suwak juka unuimajui tusa papiigtuchu aig útsua duka suwimkan jukittawai epeknun egkemá 3 nantua nuna awaktsuk, nuniachkush 8 nantua nuna uwaetsuk. Papii egketuamu atatui niish tuwig colegió wajakami nui, dutikaku nii takamuji epetbau atatui.

Art. 160.- Muunjima takatai aina nunú kakánbaunum

AWAJUN CHICHABAI JIKBAU

Yaki batsatkamu muunji adajamu aina nuna shiig takamainchau awajua, awantua, duka suwimak suwamu atatui 6 nantu epeknum egkea.

Art. 161.- Muunjimsa takastin aina nunú antugchamunum

Yaki imán tsawan suwimkan jukiti tibauwaitak achimainchau wajawa, nuniachkush pamukun antugtsuk pujawa, duka wajupa tsawantai suwimkan jukiti tibauwaita nunú aig nuigtush 3 nantu eketkamu atatui.

Art. 162.- Waji juki epeknum awayashmi tibau aig awaibaunum

Yaki aikami tichamu aig untsunika chichataiya nuna, wakan dakumka jitia nuna, chicham awetuni dekagdaitai aina nuna epeknum awaiwa, duka suwimkan jukittawai 48 horas epeknum egkemá.

Art. 163.- Achinak egkétiatlak, juka wajiik awayashmi epeknumag tibau aig juki puja nunú.

Achinak egketa nunú waji awayashmi tibau aina nuna uúka awaya pujau wainkuik bakichik nantu ékettai atatui suwimke, ataktu wainkuishkam aiksaik bakichik nantu ekettai atatui suwimke.

Art. 164.- Uumku chicham iwagmainchau wajamunum

Etsegkati tibauwa nunú, Jintiin emtika ujakbaitak, etsegkatjai tiuwaitak awake anentaimag tatsuk megkaga duka suwimak susamu atatui 48 horas epeknum egkea.

Art. 165.- Takamsamu iwainamaina nú emegkatbaunum

Yaki, jitiinu emtin chicham iwajbaunum iwainajtin ame kuitamkau atá tusa susamua nuna jujawa, uújua, yapajiawa, tsayawa, ichiawa, nuniachkush emeseawa, duka suwimka jukittawai epeknum egkemá bakichik nantua nuna awaktsuk, nuniachkush 6 nantua nuna uwaetsuk.

CAPITULO II: BATSATKAMU MUUNJI AINA NUNU TAKAÁBAU

Art. 166.- Batsatkamu muunjyitjai tusa najas dííjatbaunum

AWAJUN CHICHABAI JIKBAU

Batsatkamunum adaijamua nunú nii adaikamujiya nuna anajmas najas diájatus takakug suwimak suwam atatuí 15 tsawan epeknum egkea. Nunú adaikamua duka jiki tikichjai yapajjam atatuí.

Art. 166-A.- Wajii iniimtsuk sukagtamunum

Muunjimsa takastin adaikamua nú, dutikmainchau aig, nigki depetmamas jujú nugka duka, nuniachkush jujú jega duka ame akijuata tusa sukagta duka suwimka jukittawai bakichik mijan epeknum egkemá. Nuniak tu dutikata tusa adaikamuita duka ukumtikaku yapagtai atatuí.

Art. 167.- Batsatkamun kuitamin ati tusa adaijamu aina nunú takatjin shiig umiashbaunum.

Kuitamkagtina nú takattjin umitsuk, inamash antutsuk wekaga duka suwimkan jukittawai 48 horas epeknum egkemá.

Art. 168.- Adaimakbauwa nú ukuamunum.

Awajunti adaimagmau aina nuwiya, juju utugchatnum ukuajai tustsuk, takatjin tsawanji jegatsaig ukua duka, 6 tsawan suwimkan jukittawai epeknum egkemá. Nuniak nii jinkimujiya nuwi dakapa 5 mijan nagkaematsaigkik bakichkish tikich takatak suwam achattawai.

Art. 169.- Umintsachu aig adaibaunum

Pamuk, dutikmainchau aig, bakichik aentsun, unuimatjamuji atsujaig, nuniachkush wajuku takasti tibauwaita nui jegamujigkesh atsujaig takatan suwa duka, esakatjamu atatuí Junta Directiva ijunag.

Art. 170.- Takamunmaya wajiji juwamunum

Yaki nii taká nuwiyán, nigkikish, atsa, tikichjaigkish atuunik, tuig takawa nuwiyán kuishkinakesh, wajinakesh juwawa duka egkemá 45 tsawan suwimkan jukittawai epeknum, nuniak awagkittawai jukimua nuna imatiksag. Adaikamu aina nunú jui tunamamunum iyakug niina takatjiya nuwiya ajapeam atatuí.

Art. 171.- Nunimainchau aig akikmakta tusa imatjamunum

Adaikamuanu nii wajinmag takawa nuna anajmas kuichik akigkata tusagkesh, nuniachkush wajig amainaita nunú sujusta tusa segama duka suwimka jukittawai epeknum egkemá 3 nantua nuna awaktsuk,

AWAJUN CHICHABAI JIIKBAU

nuniachkush bakichik mijana nuna uwaetsuk, wajupa kuashtana takamsae nú diigsa. Nuigtushkam wajinmag takawa duka nuiya ajapeam atatui, dutikaku epetbau atatui 5 mijan takata jumaitu nunú.

Art. 172.- Ejamka juwamunum

Batsatkamunum muunjimamua nunú, adaikamujiya nuna ejamas kuichik taun, nuniachkush yaibau taun niinua dutikas juwak, atsa, tikichnakesh suwa duka, suwimkan jukittawai epeknun egkemá 3 nantua nuna awaktsuk, nuniachkush 8 nantua nuna uwaetsuk, nuniak awagkittawai waji juki nuna, nuniachkush awagkittawai kuishkinum. Nuigtushkam nii adaikamujiya nuiya ajapeam atatui, dutikaku tikich takatkesh sutsuk 5 mijan idainastatui.

Art. 173.- Wainka wasujkabaunum

Muunjimsa takastin adaikamua nú, kuishkin, nuniachkush waji dutik takasmi tibauwa nuna yajupea yaja awaya takak, dekas atsumaku tibauwa nuna pachitsuk idaiya duka 3 nantu awantamu atatui takatjiya nuwiya.

Art. 174.- Tsawan uwaeka akikmamunum

Takata inamna nú, kuichik aig, tuke aneas, waamak akikmakta tusa juna diin aina nú tibauwaitak tsawanta uwagak wega duka suwimkan jukittawai 48 horas epeknun egkemá.

Art. 175.- Kuitamkata waji tusa susamuanu awaktan dakitakui

Jujú kuitamjutkata tusa wajiikesh, kuishkikesh susamua nuna awaktan dakitak juninun diin aina nunú tibauwaitak yupiaj wekaga duka suwimkan jukittawai epeknun egkemá 15 tsawanta nuna awaktsuk, nuniachkush 3 nantua nuna uwaetsuk, nuniak awagkittawai waji susamuita nuna.

Art. 176.- Sumam abaunum

Muunjimtaiya nú, takatan aikatjai tusagkesh, atsa, dutikashtajai tusagkesh kuishkin tutupit suma duka, nuniachkush akiaku sumam awa duka suwimkan jukittawai epeknun egkemá 3 nantua nuna awaktsuk, nuniachkush bakichik mijana nuna uwaetsuk, wajupa amainun tunamaje nuji diigsa. Nuigtushkam niina takatjiya nuiya ajapeam atatui, dutikaku tikich takatkesh sutsuk 5 mijan idainastatui.

AWAJUN CHICHABAI JIKBAU

Jutiksaik suwimak sutai atatu batsatkamunum kuitamkagtin tusa adaijamu aina dushakam juní takabaunum wayakug.

Art. 177.- Muunjimtai aina nuna suma nunú

Yaki, wajig ainta, nuniemunum akiktajame tusa muunjimtai aina nuna tawa, nuniachkush umijtukta wii taja nunú tusa kuishkin sukagtawa, duka suwimkan jukittawai epeknun egkemá bakichik nantu awaktsuk, nuniachkush 4 nantua nuna uwaetsuk.

Art. 178.- Ejamka juwaku wiyakush wegamunum

Muunjimatin adaikamua nú jeen ekek jegamak, carro sumak, nuniachkush wajig ainta nuna sumaj wegak niish wajupak akiam awa nuna nagkaegas wiyakush wega duka, egatbau atatu wajiyaik imatikawa tusa nunú dekajuatasa. Nunú dekagbaunum, batsatkamu daajin wiyakush wegamu akuig, atanbau atatu wajiji, ajapeamu atatu tuig takawa nuiya, nuniaku bakichikish batsatkamu takatí aina duka suchatai atí tabau atatu. Suwimkanak jukittawai epeknun egkemá 3 nantua nuna awaktsuk, nuniachkush bakichik mijana nuna uwaetsuk.

CAPITULO III: CHICHAM EPEGKASHMIN WAJAMUNUM

Art. 179.- Tsanumjuja chicham egketbaunum

Yaki takamsamua imatikas, nuniachkush tikich takamsamu aig tsanumag chichaman egkeawa, atsa, wainak papiinakesh, chichamnakesh iwainawa dekas atsaig batsatkamu muunjin, duka suwimkan jukittawai epeknun egkemá bakichik nantua nuna awaktsuk, nuniachkush 6 nantua nuna uwaetsuk, nuniak akiktatui 1500 soles yanak tsanumjuje nuna.

Art. 180.- Ejetasa egamunum uchi uwá nunú

Yaki uchi tsakat shiig awagkashbauwa nuna uwawa chicham iwajatasa untsuamunum, duka suwimkan jukittawai epeknun egkemá 7 tsawanta nuna awaktsuk, nuniachkush bakichik nantua nuna uwaetsuk.

Art. 181.- Uujatbaunum

Yaki de kayatak aents takamsauwa nuna juwawa suwimkan susainum tusa, nuniachkush Jintiin suwimak jukittun yumigkagtuju asamtai

AWAJUN CHICHABAI JIKBAU

egamua nuna epeknun egkeawainum tusa uwaáwa, duka suwimkan jukittawai epeknun egkemá bakichik nantua nuna awaktsuk, nuniachkush 8 nantua nuna uwaetsuk, wajupa muunnak takamsae nují diigsa.

Art. 182.- Chicham iwagbauwa nui tsanúbaunum

Etsegkati dekamujin tusa itaamua dukesh, ejétan dekau itamua dukesh, tikich chichabai tibauwa nuna taku tawai tusa etsegna dukesh waitjus etsejaina duka suwimka jukittawai epeknun egkemá 3 tsawanta nuna awaktsuk, nuniachkush bakichik nantua nuna uwaetsuk.

Art. 183.- Utugchat epegmainchau awagkagtamunum

Yaki wajuk takawaki dutika, chichaman dekamujin etsegkati tibauwa nuna, nuniachkush papii chicham iwagbaunum iwainamaina nuna tutitag awajua, duka jukittawai suwimkan 48 horas epeknun egkemá.

Art. 184.- Achiam aig tusa awanmamunum

Yaki, epeknun egkemá suwimka jukiti tusa yumigjamaitak jujukinum tusa uwakmamkatatus awanmawa, duka, imaan tsawan achinak pujusti tibauwa nujai ijumjuja 3 nantu eketam atatui.

Art. 185.- Tupikakti tusa yayamunum

Yaki, kuashat kakájagkesh, awanmakagkesh, nuniachkush tsanumjagkesh, aents suwimak suwaku egkeamua nuna, atsa, aents achiktasa egamua nuna tupikantikawa, duka suwimkan jukittawai epeknun egkemá 3 tsawanta nuna awaktsuk, nuniachkush bakichik nantua nuna uwaetsuk.

Juní takabauwa nui muunjima takatai aina nunú iyakug, betek suwimak jui apusamua nuna jukittawai, nuniak nii takatjiya nui ajapeam atatui.

Art. 186.- Achikbau nantainamunum

Achikbauwa nunú tupikaktatus yaki kuitamua nuna suwimkug jukittawai suwimkan, duka, imaan tsawan achinak pujusti tibauwa nujai ijumjuja bakichik nantu eketam atatui, ataktú aniakuishkam aiksaik bakichik nantu eketam atatui, duka aani atatui.

Art. 187.- Utugchat iina uwejen iwagbaunum

AWAJUN CHICHABAI JIKBAU

Yaki, chichaman iwajin aina nui ematsuk nigki suwimkagtua inagnawa, duka suwimak sutai atatui waji muunna nunike nuji diigsa. Nunak Jintiin nii anentaimas diis dutikattawai, dutikmainchau wainkug suwimkagtua nunak suwimkan susashtatui.

Art. 188.- Ujuna wajasjai titasa umijmabaunum

Yaki, utugchat ajam uwemjatatus niina wajiijin kunumua yaja uuk, wika ujunayaitjai tumamtatus, duka niina wajiijiya duik akikmakti tusa atanki sujutam atatui, dutik diwijin umikti tusa.

Art. 189.- Suwimak wainka suwamunum

Jintiina nunú jujú chicham diisa iwajatna nuna diis takatsuk wainak suwimkan sukagta duka suwimkan jukittawai epeknum egkemá bakichik nantua nuna awaktsuk, nuniachkush bakichik mijana nuna uwaetsuk, nuniak nii takamujiya nui ajapeam atatui. Suwimak wainka sukagtusbauwa duka wainak jugakti tabau atatui.

Art. 190.- Wainka achiiijatbaunum

Jintiina nú tuke aneas chicham egkeamukesh atsaig nunú aents achiktajum tawa duka, nuniachkush, aents achikam egketa nunú tsawanji jegau aig jiitsuk puja duka, nii takamujiya nui jiyam atatui, nuniak suwimkan jukittawai 48 horas egkemá.

Art. 191.- Chicham iwajut dakitamunum

Jintiina nú, tuke aneas, chicham iwagta dakitau asa, nuniachkush tikich takata anajmagkesh, atsa, jujú iwajatin ley umijkamuk atsawai tusagkesh ayatak idaya duka jiyaam atatui takamujiya nui.

TITULO XVIII

BATSATKAMU TSANUAMU

CAPITULO I: PAPIINUM TSANÚBAU

Art. 192.- Papii wainka najana tsanúbaunum

Yaki, pipichinakesh, muunnakesh papiin waitjua dekas tusa antugmaina imanun najanua, nuniachkush papii dekaskea iman iwainaka chicham iwagtumamaina imanun najanua, nuniak tikich aentsnakesh bakumaina imannash tsanumua, duka suwimak susamu atatui epeknum egkea 3 tsawanta nunú awaktsuk,

AWAJUN CHICHABAI JIIKBAU

nuniachkush 3 nantua nuna uwaetsuk, wajintuk Jintiina dusha anentaimag yumigmajat imatiksag.

Art. 193.- Etsegjai tusa waitjamunum

Yaki, nii dekamujiya nuna etsejak dekaskea imanun waitjua papiin patawa, duka suwimkan jukittawai epeknun egkemá 3 tsawanta nuna awaktsuk, nuniachkush 3 nantua nuna uwaetsuk, wajintuk Jintiina dusha anentaimag yumigmajat imatiksag.

Art. 194.- Dekamu uwámunum

Adaikam takau aina nunú, takamsamun papii takakiatak ya takamsae nuna ayamjak uwá duka suwimkan jukittawai 6 tsawan epeknun egkemá.

Art. 195.- Tsayamu, nuniachkush papii uwaámu

Yaki, shiig anentsa diimainchau, tsayawa, nuniachkush uwaawa papiin nuniak tikich aents utugchatan igkumaina nui emawa, duka suwimkan jukittawai epeknun egkemá 6 tsawanta nuna awaktsuk, nuniachkush 3 nantua nuna uwaetsuk.

Art. 196.- Jata pachisa papii sukagtamunum

Tsuwajatnukesh, tsuwajatnu kadauji aina dukesh, waitjus jauwa dutika, nuniachkush jashbauwa dutika papii jiikí sukagta duka, niina apujin chicham egketam atatui, nui dita juniaunash wajuk suwimak susami tibauwaita nuna dutikatnume tusa. Tuwi takak pujusag takamsae nuiya jiiki awegam atatui.

Art. 197.- Waitjua usuamunum

Yaki, aan waitjua takámu asa, wantinja papii umika awemaku usujattai aina nuna imatikas dakumas jiiki nii tsanumag takastinnakesh, nuniachkush tikich tsanumag takastinnakesh najanua, duka suwimkan jukittawai bakichik nantu epeknun egkemá.

Art. 198.- Dekaskeapi tumain tsanujatbaunum

Yaki tikichi kuwesmataijin betek dakumak tsanumua, nuniachkush, papii unuimagbauwa imatikas najana sukagtawa unuimagchamu aig, duka suwimkan jukittawai epeknun egkemá 3 nantua nuna awaktsuk, nuniachkush 7 nantua nuna uwaetsuk.

AWAJUN CHICHABAI JIIKBAU

Art. 199.- Tsanumjamua nú juwamunum

Aents, de kayatak, papii tsanumja najanamua nuna iwainak nunii ayamjumkatatus juwa duka suwimak susamu atatui epeknum egkea bakichik (1) nantua nunú awaktsuk, nuniachkush, kumpatum (3) nantua nunu uwaetsuk.

Art. 200.- Tsanumja takastina dukesh, nuniachkush takamsatin najana umikbaukesh takakbaunum

Ajaya aents, tsanumjatasana najantai aina nuna yajuak, nuniachkush takamsatna nuna najanin, atsa, nigkikesh tsanumjatasana takatai aina nunakesh takaku awajuni nugken waya duka suwimak susamu atatui 15 tsawan epeknum egkea, nuniak niina takataiji yajutam atatui, dutika pempenku awajuni nugken puja duka jiiiki awematai atatui. Awajunitak jutik takata nuna pujuju ejekuik niina takamtaijiya nunú yajutbau atatui, nuigtushkam egkemattawai epeknum wajupa tsawan juninumash ajantiash apujtusbauwaita imanisag.

TITULO XIX

AJANKAGTASHBAUNUM

CAPITULO I: AENTS AJANTUSA DIYASHBAU

Art. 201.- Ijumja tabau

1. Yaki ajankagtatsua, nudauk atatui suwimkak.
2. Chichama egkeawa nú kumpatumá untsuamash pachitsuk idaikug, chicham egkeamu ataishkam, kumpatum nantu nagkaemakmataig nuig idaitai atatui.
3. Deká chichaman iwajatna duka batsatkamunum Jintiin puja nunú atatui.

Art. 202.- Tutit awajkagtamunum

Nuwa suwimam, jiyam, nuigtush anentai waitkam awa duka pamuk jetemjam atatui, dutikaku, waitkakagta duka jutik suwimak sunastatui:

- a) Yama nagkamchak aniamunum: kakankagta duka 48 horas suwimka jukittawai egkemá, nuniak jiyaku chichajkamu atatui.
- b) Pataka aniamunum: kakankagta duka 3 tsawan suwimkan jukittawai batsatkamun takajak.

AWAJUN CHICHABAI JIKBAU

Yaja aneas nuwakesh aishjin suwimak, jiyak waitkakug, aishmag waitkakagtakui suwimak susatin yakinchijin apujtusbauwanu susamu atatui.

Apajigkesh, atsa, dukujigkesh uchijin waitkakug pamuk chichajam atatui, tuja antutsuk patasag aniakug 3 tsawan suwimak suwamu atatui batsatkamun takajak.

CAPITULO II: WAJÍ AINA NUNU AJANTUSA DIYASHBAUNUM

Art. 203.- Atsumaku takábaunum

Segamtsuk yujumkan, umutain, akikesh ibauchu aina nuna segamtsuk juki nuig amua duka 24 horas sutai atatui suwimak epeknun egkea, nuniachkush yanak jujukie nunú takagsam awagtukta tibau atatui.

Tuja aantsag suwimka jukiu atatui, yujumkan, umutain akikmakchatnaitak segamí amua dushakam.

Art. 204.- Kuntin tagku aina nunú tikichi nugkén wainbaunum

Kuntin tagkumtai aina nunú tikichi nugkén waintua, ajaknakesh, nugkanakesh tsuwapak emesek, nuniachkush kuntin tagkubaunakesh emestuk emamtaig, yaki tagkugtinaita nunú akiktatui yanak wajupa emestuje nuna.

CAPITULO III: SHIIG BATSAMTAIYA NUNU AJANTASHBAUNUM

Art. 205.- Umutai nampetai aina nú, tikich, kusumtai aina nú tsakat sumakui suwamunum

Yaki umaku nampetai aina nuna, kusumtai aina nuna uchi tsakat sumatai suwawa, duka 48 horas epeknun egkemattawai nunii suwimkan juwak. Tuja, ataktú pataká nuniakug, sujamuji epetam atatui.

Art. 206.- Umaku nampetai aina nunú tsawan apujtusbauwa nuna uwaeki sujamunum

Yaki umaku nampetai aidaun sujawa, nunú, tsawanji aputusbauwa nuna uwaeki wegauk suwimkan jukittawai epeknun 48 horas egkemá. Juna uwaguk 200 soles akikmaktatui. Tikima aan nagkaemas intimki wegakug sujamuji epetam atatui.

AWAJUN CHICHABAI JIIBAU

CAPITULO IV: PACHIMKAS PUJUTIA NUNU AJANTASHBAU

Art. 207.- Najankamu aina nú iwagchamunum tsuwapamu

Yaki nii yumi tagkumku saekitin itaamua nú beseju aig iwajtsuk pujamunum tikichi agajin yumi utug waitkawa, duka suwimkan jukittawai epeknum 24 horas egkemá, nuniak akikmaktatui wajupa emesmakchae nuna.

Art. 208.- Senchi tupikamunum

Ishinka wekaetai aina nuna anunta nú, nuniachkush, tagku entsamka wekaetai aina nuna aweka nú, batsatkamu jinti wegaja nui senchi tupikaki wekagak aentsu tukumain waja wekaga duka 100 soles akikmaktatui, dutik suwimkan jukittawai. Aniamunum aents tukuamu akuig, suwimak sukagtusbau atatui jujú chicham umikbauwa nunú diisa.

Art. 209.- Tsuwat utsamunum

Yaki, tsuwatan utsawa nui utsaushtai aig, nuniachkush apeawa dutikak tikich batsata nuna kayuak waitkawa, duka suwimkan jukittawai epeknum 24 horas egkemá.

CAPITULO V: ANENJAS BATSATKAMUA NÚ AJANTASHBAU

Art. 210.- Dá uwamu

Ajania taáwa nunú daájin, niish nuwesh ajawash, aishjish ajawash nunakesh etsegtsuk pamukun uuja duka suwimkan jukittawai 48 horas epeknum egkemá. Egkeam jiinkish aantsag etsegtsu duka jiiki ajapeam atatui batsatkamu nugkenia.